

金匱要略直解

金匱要畧直解 中卷

南陽張

機仲景述 新安

程 林雲來註

張 邦是居較

肺痿肺癰欬嗽上氣病脉證治第七

問曰。熱在上焦者。因欬爲肺痿。肺痿之病。從何得之。
師曰。或從汗出。或從嘔吐。或從消渴。小便利數。或從
便難。又被快藥下利。重亡津液。故得之。曰。寸口脉數
其人欬。口中反有濁唾涎沫者何。師曰。爲肺痿之病。

難經曰。腎主五液。今病人或從汗吐之後。或從消渴。小便利數之後。皆令津液內亡。液亡則水不能制火。故寸口脉數。爲火盛。肺金是以肺熱葉焦。欬唾涎沫。爲肺痿之病也。肝主涎。腎主唾。脾爲肺母。腎爲肺子。肺虛則子母不能宣攝其津液。故欬則逆於上。而爲濁唾涎沫也。

若口中辟辟燥。欬卽胸中隱隱痛。脉反滑數。此爲脾癰。欬唾膿血。

若口乾燥。欬而胸中隱隱作痛者。以胸中爲肺之
部分。知肺癰已成。上症脉微數。今反滑數者。熱在
肺中。蓄結癰膿。故欬唾膿血也。

脉數虛者爲肺痿。數實者爲肺癰。

肺痿得之亡津液。故脉數虛。肺癰得之熱蓄結。故
脉數實。

問曰。病欬逆。脉之何以知此爲肺癰。當有膿血。吐之
則死。其脉何類。師曰。寸口脉微而數。微則爲風。數則

金匱要略卷之八
二
爲熱。微則汗出。數則惡寒。風中於衛。呼氣不入。熱過
於榮。吸而不出。風傷皮毛。熱傷血脉。風舍於肺。其人
則欬。口乾喘滿。咽燥不渴。多唾濁沫。時時振寒。熱之
所過。血爲之凝滯。畜結癰膿。吐如米粥。始萌可救。膿
成則死。

何以知其爲肺癰。脰其脉寸口微而數。微則爲風。
風中於衛。傷其皮毛。故微則汗出也。數則爲熱。熱
過於榮。傷其血脉。故數則惡寒也。一呼一吸。榮衛

流行。今風中於衛。熱過於榮。呼吸之間。致榮衛失其出入之常度。故有呼氣不入。而吸氣不出也。肺合皮毛。始而風傷皮毛。久則風舍於肺。肺傷則欬而喘滿。雖口乾咽燥。而多吐濁沫。故不渴也。時時振寒者。表氣不守。表中邪熱過於肺經。則血凝膿結。故吐如米粥也。始萌則肺未傷。故可救。膿成則肺已壞。故死。

王好古曰。經言呼出心與肺。吸入腎與肝。或云呼

出腎與肝。吸入心與肺。何也。荅曰。呼不再呼。肺氣隨陽已入。吸不再吸。肝氣隨陰已出。大抵呼出心與肺。從天而言也。吸入腎與肝。從地而言也。噫。呼中有吸。不爲獨陽。吸中有呼。不爲獨陰。呼吸之中。陰陽互宅。故仲景言。呼氣不入。吸氣不出。詞旨甚深。反言見意。學者究心。

止氣。面浮腫。肩息。其脉浮大不治。又加利尤甚。

上氣則喘。喘甚則撻肩。故曰肩息。以肩息則肺氣

衰。面腫則胃氣竭。浮大者。虛脉也。故爲不治。加之
以利。則脾土又衰。故云尤甚。

上氣喘而躁者。屬肺脹。欲作風水。發汗則愈。

形寒飲冷則傷肺。肺傷則上氣喘息而煩躁也。由
於金令不宣。風寒冷飲壅塞肺經。而欲作風水之
證。發其汗。則風去飲行。而肺脹悉愈。

肺痿吐涎沫而不欬者。其人不渴。必遺尿小便數。所
以然者。以上虛不能制下故也。此爲肺中冷。必眩。多

涎唾。甘草乾薑湯以溫之。若服湯已渴者屬消渴。

肺痿但吐涎沫而不欬者。上焦無熱也。無熱則不渴。唯其上焦無熱。則肺中虛冷。不能禁制下焦。約束便溺。故遺尿而小便數也。肺既虛冷。又不能宣攝五液。但鬱於肺經而爲涎唾。逆於頭而爲眩也。

甘草乾薑湯方

甘草 四兩 炙

乾薑 二兩 炮

右咬咀。以水三升。煮取一升五合。去滓。分溫再

服。

肺冷者。溫以乾薑。肺虛者。補以甘草。若服湯已而作渴者。此肺虛引水自救。又屬消渴之證。

肺痿有寒熱辨。肺痿一症。上章言熱在上焦。下章言此爲肺中冷。似前後矛盾。夫脾爲胃行津液。以輸於肺。津液亡。則肺熱葉乾。乾則欬。欬則胃中涎唾上引。故曰熱在上焦者。因欬爲肺痿。此屬於熱人所易知。至於上焦之陽。隨津液以亡者。則金

寒胃冷涎唾上溢肺藏受傷故曰肺痿唾涎沫而不欬此屬於寒人所未易識也然欬者爲熱不欬者爲寒是爲易辨矣其熱在上焦仲景不云何方以治其肺中冷者溫以甘草乾薑二物雖爲溫肺其實甘草以和胃乾薑以溫脾胃和則涎唾能散脾溫則津液能行子虛補母爲不易之良方也欬而上氣喉中水鷄聲射干麻黃湯主之。

射干麻黃湯方

射干 三兩

麻黃 四兩

生薑 四兩

細辛

紫苑

款冬花 各三兩

五味子 半升 大棗 七枚

半夏 半升洗

右九味以水一斗二升先煮麻黃兩沸去上沫
內諸藥煮取三升分溫三服

欬而上氣如水鷄聲連連不絕者是湯主之內經
曰肺苦氣上逆急食苦以泄之射干紫苑之苦所
以泄逆氣也以辛瀉之麻黃生薑細辛半夏款冬

之辛所以瀉風邪也。以酸收之。以酸補之。五味之酸以補不足。虛則補其母。大棗之甘所以補母。欬逆上氣。時時唾濁。但坐不得眠。皂莢丸主之。

皂莢丸方

皂莢

八兩刮去皮用酥炙

右一味。末之。蜜丸。梧子大。以棗膏和湯服三丸。日三夜一服。

濁唾壅塞於肺。則不得卧。故時時唾濁也。皂莢味

辛鹹辛能散鹹能軟宣壅導滯利竅消風莫過於此故欬逆上氣時時唾濁坐不得卧者宜之然藥性慄悍佐棗膏之甘以緩其藥勢

欬而脉浮者厚朴麻黃湯主之脉沉者澤漆湯主之浮則爲風厚朴麻黃湯以散風邪沉則爲寒澤漆湯以溫肺氣

厚朴麻黃湯方

厚朴

五兩

麻黃

四兩

石膏

如雞子大

杏仁 半升

半夏 半升

乾薑 二兩

細辛 二兩

小麥 一升

五味子 半升

右九味以水一斗二升。先煮小麥熟去滓。內諸藥煮取三升。溫服一升。日三服。

麻黃石膏細辛。開腠理而致津液。半夏乾薑杏仁。止喘欬而下逆氣。厚朴平胃。小麥補脾。五味補肺。九味治欬而脉浮者用之。

澤漆湯方

半夏 半升

紫參

五兩一作紫苑

澤漆

三升以東流

一斗五升

生薑

五兩

白朮

五兩

甘草

黃芩

人參

桂枝

各三兩

右九味。咬咀。內澤漆汁中。煮取五升。溫服五合。

至夜盡

脉沉者。非寒邪。卽有伏飲。以澤漆半夏長於消痰。水。生薑桂枝長於泄風邪。甘草人參長於補肺金。

白前紫苑黃芩長於止喘欬九味治欬而脉

沉者用之

大逆上氣咽喉不利止逆下氣者麥門冬湯主之

麥門冬湯方

麥門冬 七升

半夏 一升

人參 二兩

甘草 二兩

粳米 三合

大棗 十二枚

右六味以水一斗六升煮取六升溫服一升日
三夜一服

大逆上氣則爲喘爲欬咽喉爲之不利麥門冬半

夏以下氣粳米大棗以補脾甘草人參以補肺脾肺相生則氣得歸原而大逆上氣自止肺癰喘不得卧葶藶大棗瀉肺湯主之。

癰生於肺隔礙上焦故喘喘則不得卧與葶藶以瀉肺定喘則邪去大棗以補脾益胃則正復而葶藶又過於瀉肺緩以大棗之甘也。

葶藶大棗瀉肺湯方

葶藶

熬令黃色搗丸如彈子大

大棗

十二枚

右先以水三升煮棗取二升去棗內葶藶煮取一升頓服。

欬而胸滿振寒脉數咽乾不渴時時濁唾腥臭久久吐膿如米粥者爲肺癰桔梗湯主之。

胸滿振寒脉數癰已成也咽乾不渴時出濁唾膿已成也甚則至於腥臭矣故用桔梗湯以解毒。

桔梗湯方

桔梗 一兩

甘草 一兩

右二味以水三升煮取一升分溫再服則吐膿血也。

桔梗之辛苦以解毒甘草之甘溫以排膿已結癰膿必吐出而後愈故再服則吐膿血。

欬而上氣此爲肺脹其人喘目如脫狀脉浮大者越婢加半夏湯主之。

風寒客於肺中則肺竅不利故喘欬上氣喘欬甚者則目張故目如脫狀也前證肺衰則喘息動形

胃竭則面浮腫故脉浮大不治。今脉浮爲風大爲寒風寒壅於上焦故用此湯發汗。

越婢加半夏湯方

麻黃

六兩

石膏

半斤

生薑

三兩

大棗

十五枚

甘草

二兩

半夏

半斤

右六味以水六升先煮麻黃去上沫內諸藥煮取三升分溫三服。

辛以散之麻黃石膏生薑半夏之辛以散逆氣甘

以緩之。甘草大棗之甘以緩逆氣。辛甘相合。脾肺發越。則上焦之邪必從汗出而泄也。

肺脹欬而上氣。煩躁而喘。脉浮者。心下有水。小青龍加石膏湯主之。

上證喘而躁者。屬肺脹。欲作風水。發汗則愈。此症心下有水。亦與上證不殊。故用小青龍加石膏湯以發汗。

小青龍加石膏湯方

麻黃

芍藥

桂枝

細辛

各三兩

石膏

二兩

甘草

乾薑

各三兩

五味子

半夏

各半升

右九味以水一斗先煮麻黃去上沫內諸藥煮
取三升強人服一升羸者減之日三服小兒服
四合

麻黃桂枝乾薑用以止欬逆細辛半夏用以去水
飲五味芍藥用以收逆氣石膏甘草用以止躁喘

九味爲治肺脹去水飲散風寒之重劑。

肺癰胸脹滿。一身面目浮腫。鼻塞。清涕出不聞香臭。酸辛。欬逆。上氣喘鳴。迫塞。葶藶大棗瀉肺湯主之。癰在肺。則胸脹滿。肺調百脉而主皮毛。肺病。則一身面目浮腫也。肺開竅於鼻。肺氣壅滯。則高門不開。但清涕滲出。而濁膿猶塞於鼻。肺之間。故不聞香臭。酸辛也。以其氣逆於上焦。則有喘鳴迫塞之證。與葶藶大棗湯以瀉肺。

奔豚氣病脉證治第八

師曰病有奔豚有吐膿有驚怖有火邪此四部病皆從驚發得之。

篇目止有奔豚一證而吐膿驚怕火邪皆簡脫必有缺文經曰太陽傷寒者加溫鍼必驚也若鍼處被寒核起而赤者必作奔豚發汗後臍下悸者欲作奔豚故奔豚病從驚發而得。

師曰奔豚病從少腹上衝咽喉發作欲死復還止皆

從驚恐得之。

坎爲豚。水畜而性趨下。以驚傷心。恐傷腎。則腎氣凌心而逆上。如賁突之狀。故從少腹上衝胸咽也。氣衝上則發時欲死。氣下則還止。以時作時止。而其病亦有間。有甚。皆從驚恐而得。

奔豚氣。上衝胸。腹痛。往來寒熱。奔豚湯主之。

腎氣上衝。則水火相搏。陰陽交爭。而作往來寒熱。奔豚湯所以泄其衝逆。

奔豚湯方

甘草

芡薊

當歸 各二兩

半夏 四兩

黃芩 二兩

生葛 五兩

芍藥 二兩

生薑 四兩

甘李根白皮 一升

右九味以水二斗煮取五升溫服一升日三夜
一服。

辛能散逆當歸芡薊半夏生薑以散逆甘能緩急
甘草生葛李根白皮以緩急酸以收之芍藥之酸

以歛腎邪。苦以堅之。黃芩之苦以堅腎氣。

發汗後。燒鍼令其汗。鍼處被寒。核起而赤者。必發奔豚。氣從少腹上至心。灸其核上各一壯。與桂枝加桂湯主之。

燒鍼卽素問燔鍼焮鍼。川蜀謂之煨鍼。用以行痺潰癰而昧者。以治傷寒熱病。卽非也。發汗後復加燒鍼以發其汗。寒聚鍼處。則核起而赤。損陰血而驚心。心虛則腎氣上逆。發爲奔豚。先灸核上以散

其寒。次與桂枝加桂湯。以泄奔豚之氣也。

桂枝加桂湯方

桂枝

五兩原
三兩

芍藥

三兩

甘草

二兩炙

生薑

三兩

大棗

十二枚

右五味。以水七升。微火煮取三升。去滓。溫服一升。

發汗後。臍下悸者。欲作奔豚。茯苓桂枝甘草大棗湯主之。

難經曰。腎之積名曰奔豚。發於少腹。上至心下。若
江豚之或上或下。久不已。令人欬逆。骨痿少氣。以
丙丁日得之。今發汗後。晡下悸。欲作奔豚。雖非丙
丁日得。然汗者心之液。汗多則心氣虛。腎氣因動
也。丙丁亦屬心也。故以茯苓爲君。伐腎邪而利水。
桂枝爲臣。泄腎氣以行陰。甘草爲佐。大棗爲使。二
物用以入脾。令土能勝水。甘爛水者。揚之則甘而
輕。取其不助腎邪也。

茯苓桂枝甘草大棗湯方

茯苓

半斤

甘草

二兩炙

大棗

十五枚

桂枝

四兩

右四味以甘爛水一斗先煮茯苓減二升去滓藥煮取三升去滓溫服一升日三服

甘爛水法取水二斗置大盆內以杓揚之水上有珠子五六千顆相逐取用之

胸痺心痛短氣病脉證治第九

師曰夫脉當取大過不及陽微陰弦卽胸痺而痛所

以然者。責其極虛也。今陽虛知在上焦。所以胸痺心痛者。以其陰弦故也。

陽微者。微則無氣。不及脉也。陰弦者。弦則爲痛。大過脉也。陽微則上焦陽虛。陰邪乘其虛而客於上焦。故作胸痺心痛。

平人無寒熱。短氣不足以息者。實也。

經曰。跌陽脉微而緊。緊則爲寒。微則爲虛。微緊相搏。則爲短氣。此因於虛寒而短氣也。經曰。短氣腹

滿而喘。有潮熱者。此外欲解。可攻裏也。是因於實。熱而短氣也。若平人無已上寒熱二證。但短氣不足以息。則胸中有邪阻隔。爲上焦實也。

胸痺之病。喘息欬唾。胸背痛。短氣。寸口脉沉而遲。關上小緊數。桔樓薤白白酒湯主之。

內經曰。肺痺者。煩滿喘而嘔。心痺者。脉不通。煩則心下鼓。暴上氣而喘。胸中者。心肺之分。故作喘息欬唾也。諸陽受氣於胸。而轉行於背。氣痺不行。則

膈背爲痛。而氣爲短也。寸脉沉遲。關脉小緊。皆寒
客上焦之脉。數字誤。

栝樓薤白白酒湯方

栝樓實一枚 薤白半斤 白酒七升

右三味同煮取二升。分溫再服。

薤白辛滑。能散結氣爲君。栝樓甘潤。能利咽膈爲
臣。滑潤之劑。所以去着也。白酒下氣除痺。以爲佐。
冠宗奭曰。薤葉光滑。露亦難竝。方中用之。取其滑

泄之義。

胸痺不得臥。心痛徹背者。栝樓薤白半夏湯主之。

胸痺心痛徹背者。亦用栝樓薤白白酒湯。以不得臥。故加半夏。亦千里流水湯之義。於前方中加半夏半升。

胸痺。心中痞氣。氣結在胸。胸滿。脇下逆搶心。枳實薤白桂枝湯主之。人參湯亦主之。

痞氣結於胸。故胸滿。脇下逆搶心者。肝木上逆也。

枳實厚朴能下氣。栝樓薤白能利膈。不得桂而桂。桂枝能去脇下逆氣。

枳實薤白桂枝湯方

枳實

四枚

厚朴

四兩

薤白

半斤

桂枝

一兩

栝樓實

一枚搗

右五味。以水五升。先煮枳實厚朴。取二升。去滓。內諸藥。煮數沸。分溫三服。

人參湯方

人參

甘草

乾薑

白朮

各三兩

右四味以水八升。煮取三升。溫服一升。日三服。
此卽理中湯也。中氣強則痞氣能散。胸滿能消。胸
氣能下。人參白朮所以益脾。甘草乾薑所以溫胃。
脾胃得其和。則上焦之氣開發。而胸痹亦愈。

胸痹。胸中氣塞短氣。茯苓杏仁甘草湯主之。橘枳薑
湯亦主之。

膈中爲氣之海。痺在胸中。則氣塞短氣也。神農經曰。茯苓主胸脇逆氣。杏仁主下氣。甘草主寒熱邪氣。爲治胸痺之輕劑。

茯苓杏仁甘草湯方

茯苓

三兩

杏仁

五十箇

甘草

一兩

右三味以水一斗。煮取五升。溫服一升。日三服。不差更服。

橘皮枳實生薑湯方

橘皮 一斤

枳實 三兩

生薑 半斤

右三味以水五升。煮取二升。分溫再服。

氣塞氣短。非辛溫之藥不足以行之。橘皮枳實生薑辛溫同爲下氣藥也。內經曰。病有緩急。方有大小。此胸痺之緩者。故用君一臣二之小方也。胸痺緩急者。薤白附子散主之。

寒邪客於上焦。則痛急。痛急則神歸之。神歸之則氣聚。氣聚則寒邪散。寒邪散則痛緩。此胸痺之所

以有緩急者。亦心痛去來之義也。薏苡仁以除痺下氣。大附子以溫中散寒。

薏苡附子散方

薏苡仁

十五兩

大附子

十枚炮

右二味杵爲散。服方寸匕。日三服。

心中痞。諸逆心懸痛。桂枝生薑枳實湯主之。

心中痞。卽胸痺也。諸逆。如脇下逆搶心之類。邪氣獨留於上。則心懸痛。枳實以泄痞。桂枝以下逆。生

薑以散氣。

桂枝生薑枳實湯方

桂枝

生薑

各三兩

枳實

五枚

右三味以水六升煮取三升分溫三服。

心痛徹背背痛徹心烏頭赤石脂丸主之。

寒邪客上焦近於前則心痛徹背近於後則背痛

徹心故用辛熱之劑以散寒邪行結氣。

赤石脂丸方

蜀椒

法一兩一分

烏頭

一分

炮附子

半兩炮一法一分

乾薑

法一兩一分

赤石脂

一兩一法二分

右五味末之。蜜丸如梧子大。先食一丸。日三服。

不知稍加服。

按上證必有沉寒在胃而蟲動於膈故用烏附石脂以溫胃乾薑蜀椒以殺蟲與上入方不侔也。

九痛丸治九種心痛

非仲景方

附子

二兩炮

生狼牙

一兩炙香

巴豆

一兩去皮心熬研如脂

人參

乾薑

吳茱萸

各一兩

右六味末之煉蜜丸。如梧子大。酒下。強人初服
三九日三服。弱者二丸。兼治卒中惡。腹脹痛
口不能言。又治連年積冷流注。心胸痛。并冷衝

上氣。落馬墜車血疾等。皆主之。忌口如常法。

九痛者。一蟲心痛。二注心痛。三風心痛。四悸心痛。
五食心痛。六飲心痛。七冷心痛。八熱心痛。九去來
心痛。雖分九種。不外積聚痰飲結血。蟲注寒冷而

成附子巴豆散寒冷而破堅積。狼牙共黃殺蟲注
而除痰飲。乾薑人參理中氣而和胃脘。相將治九
種之心痛。巴豆除邪殺鬼。故治中惡腹脹痛口不
能言。連年積冷流注。心胸痛冷氣上衝。皆宜於辛
熱。辛熱能行血破血。落馬墜車。血凝血積者。故并
宜之。

腹滿寒疝宿食病脉證治第十

跌陽脉微弦法當腹滿。不滿者必便難。兩脇疼痛。此

虛寒從下上也當以溫藥服之。

趺陽胃脉也。弦肝脉也。趺陽微弦乃木鬱土中。故腹滿也。若不滿則肝木自鬱於脇下。失其疎泄之性而爲便難。脘脇下肝之部分。故兩脇疼痛也。此虛寒從下土入於脾土。當以溫藥服之。若寒實則用後條溫藥下之也。

病者腹滿按之不痛爲虛痛者爲實。可下之。舌黃未下者下之黃自去。

腹滿之證。虛者可按。實者不可按。故實者當下之。
若舌有黃胎。而未經下者。則實熱結於中焦。下之
則實熱除。而黃胎自去。

腹滿時減。復如故。此爲寒。當與溫藥。

腹滿不減。故用承氣下之。此腹滿時減。則寒氣或
聚或散。當與溫藥以散其寒。

病者痿黃。躁而不渴。胸中寒實。而利不止者。死。

痿者脾氣衰。黃者脾色見。夫躁而渴者爲熱。今躁

而不渴。則胸中之宗氣不能以勝陰寒。而爲陰躁。故不渴也。病人旣痿黃。又兼之下利不禁。則脾氣衰絕。故死。

寸口脉弦者。卽脇下拘急而痛。其人嗇嗇惡寒也。

弦。肝脉陰也。肝脉循脇裏。夫寒主收引。故脇下拘急而痛。以寒勝於內。而陽氣不行於外。外亦嗇嗇而惡寒也。

夫中寒家喜欠。其人清涕出。發熱色和者善嚏。

肺主欠。欠者張口呵吸伸臂轉腰之狀。今寒邪客於皮毛。陰陽邪正相引。故作欠也。肺主涕。如天寒則涕出。肺寒則清涕亦出也。寒則面慘而不和。今發熱色和。則寒鬱於肺經而爲熱也。靈樞經曰。陽氣和利。滿於心。出於鼻。故爲嚏。此氣和於中而現於外。故面色和者善嚏也。

中寒其人下利。以裏虛也。欲嚏不能。此人肚中寒。裏虛不勝寒。則下利。上證中寒發熱色和則善嚏。

今肚中寒。陽氣不得和利。是以欲噦而不能。

夫瘦人繞臍痛。必有風冷穀氣不行。而反下之。其氣必衝。不衝者心下則痞。

瘦人。虛弱人也。若繞臍作痛。必有風冷。有穀氣着而不行。瘦人未可劇下。而反下之。則風冷之氣必上衝。如不上衝。必乘虛而結於心下爲痞也。

病腹滿。發熱十日。脉浮而數。飲食如故。厚朴七物湯主之。

腹滿者內有實熱也。脈浮而數浮則爲風。風爲表邪。故發熱十日數則爲熱。熱則消穀。故飲食如故。與下方蕩腹滿而除表熱。夫表裏俱實。當先解表。乃可攻裏。今表邪微而裏邪甚。故用承氣桂枝二湯相合。以和表裏。如傷寒之用大柴胡湯。此其義也。

厚朴七物湯方

厚朴

半斤

甘草

大黃

各三兩

大棗

十枚

枳實

五枚

桂枝

二兩

生薑

五兩

右七味。以水一斗。煮取四升。溫服八合。日三服。
嘔者加半夏五合。下利去大黃。寒多者加
生薑至半斤。

厚朴枳實大黃。大承氣湯云芒硝也。桂枝甘草生
薑大棗桂枝湯去芍藥也。二方相合。爲治腹滿發
熱之劑。半夏止嘔逆。大黃蕩結實。生薑溫脾胃。

當如法加減。

腹中寒氣。雷鳴切痛。胸脇逆滿嘔吐。附子粳米湯主之。

靈樞經曰。邪在脾胃。陽氣不足。陰氣有餘。則寒中。腸鳴腹痛。又曰。脾足太陰之別。名曰公孫。實則腹中切痛。蓋脾胃喜溫而惡寒。寒氣客於中。奔迫於腸胃之間。故作雷鳴切痛。胸脇逆滿嘔吐也。附子粳米湯以散寒止逆。

附子粳米湯方

附子 一枚炮

半夏 半斤

甘草 一兩

大棗

十枚

粳米

半升

右五味。以水八升。煮米熟。湯成去滓。溫服一升。

日三服。

療寒以熱藥。腹中寒氣。非附子辛熱不足以溫之。雷鳴切痛。非甘草大棗粳米之甘。不足以和之。逆滿嘔吐。非半夏之辛。不足以散之。五物相需而爲。

佐使。

痛而閉者。厚朴三物湯主之。

厚朴三物湯方

厚朴

八兩

大黃

四兩

枳實

五枚

右三味。以水一斗二升。先煮二味。取五升。內大黃煮取三升。溫服一升。以利爲度。

此方卽小承氣湯也。本草云。通可以去滯。洩可以去閉。痛而閉者。以湯蕩滌之。使塞者利而閉者通。

矣。

按之心下滿痛者。此爲實也。當下之。宜大柴胡湯。

大柴胡湯方

柴胡 半斤

黃芩 三兩

芍藥 三兩

半夏 半斤 洗

枳實 四枚 炙

大黃 二兩

大棗 十二枚

生薑 五兩

右八味。以水一斗二升。煮取六升。去滓。再煎。溫

服一升。日三服。

按之不痛爲虛。按之痛爲實。當下之。柴胡性涼。能推陳致新。折熱降火。用之爲君。枳實芍藥。合用能除堅破積。助大黃而攻心下滿。爲臣。黃芩除熱涼心。用之爲佐。生薑半夏之辛。以散之。大棗之甘。以緩之。故以爲使。

腹滿不減。減不足言。當須下之。宜大承氣湯。

腹滿不減。當須下之。若減則不可下也。

大承氣湯方

大黃

四兩酒洗

厚朴

半斤炙去皮

枳實

五枚炙

芒硝

三合

右四味以水一斗先煮二物取五升去滓內大黃煮取二升去滓內芒硝更上火微煮一二沸分溫再服得下止服。

苦泄滿。臍軟堅。大黃芒硝之苦。臍以下堅滿。辛散結。酸涌泄。厚朴枳實之辛酸。以破結實。凡人胃氣爲濕熱所傷。必瀉其土實。而元氣乃得上下同。

流此承氣之所由名也。

心胸中大寒痛。嘔不能飲食。腹中寒。上衝皮起。出見有頭足。上下痛不可觸近。大建中湯主之。

寒氣客於心胸之間。則拒格飲食。故嘔不能食也。寒氣搏於腸胃之外。沖突出見於皮膚膜原之分。如有頭足。其痛則近於外。故不可以手觸近也。與大建中湯以溫中散寒。

大建中湯方

蜀椒

二合去汗

乾薑

四兩

人參

二兩

右三味以水四升煮取二升去滓內膠飴一升微火煎取一升半分溫再服如一炊頃可飲粥二升後更服當一日食糜溫覆之

內經曰寒者熱之虛者益之蜀椒乾薑之辛熱用以散寒邪人參膠飴之甘溫用以補中氣

脇下偏痛發熱其脉緊弦此寒也以溫藥下之宜大黃附子湯。

上證脇痛。嗇嗇惡寒。今脇痛發熱。則脇痛亦令入發熱惡寒也。靈樞經曰。迴腸當臍左環迴。則臍左與脇相近。此必有寒實結於腸間。故脉弦緊而脇下偏痛也。當以溫藥下其寒實。

大黃附子湯方

大黃 三兩

附子 三枚炮

細辛 二兩

右三味。以水五升。煮取二升。分溫三服。若強人。煮取二升半。分溫三服。服後如人行四五里。進

一服。

大黃苦寒。走而不守。非寒者所宜。佐附子細辛之
大熱。則寒性散而走泄之性存。亦反佐以取之之
法也。

寒氣厥逆。赤丸主之。

手足厥逆。寒淫所勝也。赤丸以溫經散寒。

赤丸方

茯苓

四兩

半夏

四兩
洗一
方用桂

烏頭

二兩
炮

細辛

一兩千金
作人參

右六味末之。內真朱爲色。煉蜜丸。如麻子大。先
食飲酒下三丸。日再夜一服。不知稍增之。以知
爲度。真朱是硃砂

方中簡脫二味。非六味也。溫經散寒。無非辛熱之
劑。四逆湯輩可選用之。不必拘泥。

腹痛脉弦而緊。弦則衛氣不行。卽惡寒。緊則不欲食。
邪正相搏。卽爲寒疝。寒疝繞臍痛苦。發則白汗出。手

金匱要略直解 卷中 三
足厥冷其脉沉緊者大烏頭煎主之。

弦爲痛。痛則氣行於內而不衛於外。故外則惡寒。緊爲寒。寒則不能以消穀。故不欲食。此寒邪在於腹中如此。若寒邪與正氣相搏。結於下焦。則爲寒疝。寒疝繞臍痛苦。痛則白汗出。白汗者。冷汗也。以汗出則陽虛而陰勝。陽氣不能充於四末。故手足厥冷。當其寒在腹中。則腹痛而脉弦緊。及寒邪結於下焦。則爲疝痛而脉沉緊也。大烏頭煎以散下。

焦之寒。

烏頭煎方

烏頭

大者五枚熬去皮不咬咀

右以水三升。煮取一升。去滓。內蜜二升。煎令水氣盡。取二升。強人服七合。弱人服五合。不差。明日更服。不可一日再服。

烏頭大熱大毒。破積聚寒熱。治臍間痛不可俛仰。故用之以治繞臍寒疝痛苦。治下焦之藥味不宜

多。多則氣不專。此沉寒痼冷。故以一味單行。則其力大而厚。甘能解藥毒。故內蜜煎。以制烏頭之大熱大毒。

寒疝腹中痛及脇痛裏急者。當歸生薑羊肉湯主之。此寒疝之輕者。不繞臍痛苦。但腹痛脇痛裏急。是寒邪散漫於腹脇之間也。故用當歸生薑羊肉湯緩劑以和之。

一 當歸生薑羊肉湯方

當歸 三兩

生薑 五兩

羊肉 一斤

右三味以水八升煮取三升溫服七合日三服
若寒多者加生薑成一片痛多而嘔者加橘皮
二兩白朮一兩加生薑者亦加水五升煮取三
升二合服之

寒疝腹痛者溫以生薑之熱脇痛者散以當歸之
辛裏急者緩以羊肉之甘則上證可愈

寒疝腹中痛逆冷手足不仁若身疼痛灸刺諸藥不

能治。抵當烏頭桂枝湯主之。

寒淫於內。則腹中痛。寒勝於外。則手足逆冷。甚則
至於不仁。而身體疼痛也。此內外有寒。卽灸刺諸
藥亦不能治。故用辛甘大熱之劑以療之。

烏頭桂枝湯方

烏頭

右一味。以蜜二斤。煎減半。去滓。以桂枝五合解
之。令得一升後。初服二合。不知卽服三合。又
知不

復加至五合其知者如醉狀得吐者爲中病

烏頭煎熱藥也能散腹中寒痛桂枝湯表藥也能解外證身疼二方相合則能達藏府而利榮衛和血氣而播陰陽其藥勢翕翕行於肌肉之間恍如醉狀如此則外之凝寒已行得吐則內之冷結將去故爲中病

其脉數而緊乃弦狀如弓弦按之不移脉數弦者當下其寒脉繁大而遲者必心下堅脉大而緊者陽中

有陰可下之。

經曰脉浮而緊者名曰弦也。今云脉數而緊乃弦。豈浮緊爲弦緩數緊爲弦急者耶。脉數弦脉緊大而遲脉大而緊三者皆陽中有陰。審其可下則下之也。

問曰人病有宿食何以別之。師曰寸口脉浮而大按之反澀尺中亦微而澀故知有宿食。大承氣湯主之。

前方見

寸口脉浮大非宿食也。以按之反濇則知上焦之氣不行。靈樞經曰：上焦開發，宣五穀味。今宿食積於中焦，則上焦不能宣發，故寸口脉濇也。宿食積而不行，則下焦不能濟泌別汁，成糟粕而俱下於大腸，則尺中亦微而濇也。與大承氣湯以推蕩其宿食。

脉數而滑者實也。此有宿食下之愈。宜大承氣湯。數爲熱，滑爲實。已成實熱，故當下之。

下利不欲食者有宿食也當下之宜大承氣湯

宿食不消故下利而不欲食用大承氣湯以下其

宿食

宿食在上脘當吐之宜瓜蒂散

瓜蒂散方

瓜蒂 一分熬
赤小豆 一分煮

右二味杵爲散以香豉七合煮取汁和散一錢

匕溫服之不吐者少加之以快吐爲度而止亡

血及虛者不可與之。

內經曰其高者因而越之宿食在上脘者故用酸苦以涌泄赤小豆味酸瓜蒂香豉味苦三味相合而爲吐劑。

脉緊如轉索無常者有宿食也。

緊爲寒寒不殺穀故有宿食。

脉緊頭痛風寒腹中有宿食不化也。

頭痛風寒外有寒邪也寒令脉緊以脾胃喜溫而

惡寒外既有寒邪。卽腹中有宿食。亦令不消化也。

五藏風寒積聚病脉證并治第十一

肺中風者。口燥而喘。身運而重。胃而腫脹。

風爲陽邪。中於燥金。則口燥。彭彭而喘。欬。肺病也。

內經曰。肺調百脉。又曰。藏真高於肺。以行榮衛陰。

陽。失其職。而中於邪。則不能內溉藏府。外輸皮毛。

血氣不得歸於權衡。則身運而重。運之甚者。則胃。

重之漸者。則腫。故胃而腫脹。

肺中寒吐濁涕

寒主收引。肺中寒。則擁遏津液而涕唾稠粘。故吐濁涕。或曰。肺中寒當吐清涕。而此曰濁涕。何也。曰。清涕出於清道。必從鼻出。此寒鬱成熱。則濃滯稠粘。不能上越。故從口出也。

肺死藏浮之虛。按之弱如葱葉。下無根者死。

內經曰。真藏脉見者死。此五藏之死脉也。肺藏死浮而虛。肝藏死浮而弱。心藏死浮而實。脾藏死浮

而大。腎藏死浮而堅。五藏俱兼浮者。以真氣渙散不收。無根之謂也。內經曰。真肺脉至。如以羽毛中人膚。非浮之虛乎。葱葉中空草也。若按之弱如葱葉之中空。下又無根。則浮毛虛弱。無胃氣。此真藏已見。故死。

肝中風者。頭目瞶。兩脇痛。行常偃。令人嗜甘。

肝主風。風勝則動。故頭目瞶動也。肝脉布脇肋。故兩脇痛也。風中於肝。則筋脉急引。故行常偃。偃者。

不得伸也。淮南子曰：木氣多，僂僂之義，正背曲肩垂之狀，以筋脉急引於前故也。此肝正苦於急急，食甘以緩之，是以令人嗜甘也。

肝中寒者，兩臂不舉，舌本燥，喜太息，胸中痛，不得轉側，食則吐而汗出也。

此條全無肝經見證，以肝中於寒，寒邪先傷所不勝，而及於心，故心先病，兩臂不舉者，心脉循臂也。舌本燥者，心開竅於舌也。喜太息者，心氣抑而不

伸也。胸中者。心之部分。寒邪拒格於胸中。則胸中痛。不能轉側。食亦不納而吐出。

吐則心之液隨以上越。故汗出也。

肝死藏。浮之弱。按之如索不來。或曲如蛇行者死。

肝藏死。浮之弱。失肝之職而兼肺之刑。按之不如

弓弦而如索。如索則肝之本脈已失。不來則肝之

真氣已絕。或有如蛇行之狀。蛇行者。曲折逶迤。此

脈欲作弦而不能。故曲如蛇行。其死宜矣。按內經

曰。脂脈如橫格。亦死。其曲其橫。本無二理。同者審

之

肝着其人常欲蹈其胸上。先未苦時。但欲飲熱。旋覆
花湯主之。方見婦人雜病

肝着於邪。則傳之於心。蹈其胸者。欲人重按其心
之謂。重按之則寒氣散而炅氣復。故未病時亦欲
飲熱湯以散其寒。

心中風者。翕翕發熱。不能起。心中饑。食即嘔吐。

心主熱中於風。則風熱相搏。而翕翕發熱不能起。

心中雖饑以風擁逆於上卽食亦嘔吐也。

心中寒者其人苦病心如噉蒜狀劇者心痛徹背背
痛徹心譬如蠱注其脉浮者自吐乃愈。

內經曰心惡寒寒邪干心心火彼斂而不得越則
如噉蒜狀而辛辣憤憤然而無奈故甚則心痛徹
背背痛徹心如蠱注之狀也若其脉浮者邪在上
焦得吐則寒邪越於上其病乃愈。

心傷者其人勞倦卽頭面赤而下重心中痛而自煩

發熱當臍跳其脉弦此爲心藏傷所致也。

心藏已傷若勞倦卽擾其陽而面赤面赤則陽氣浮於上而上盛下虛下焦爲之怠惰身重也心傷則痛心虛則煩腎氣乘其心虛欲上凌心則水火爭而身發熱築築然而臍跳動其脉弦而不鈎則本藏之脉不現知其爲心藏傷也。

心死藏浮之實如丸豆按之益躁疾者死。

內經曰真心脉至堅而搏如循薏苡子累累然卽

浮之實如丸豆按之益躁疾之脉

邪哭使覓覓不安者血氣少也血氣少者屬於心。心氣虛者其人則畏合目欲眠夢遠行而精神離散。覓覓妄行陰氣衰者爲癲陽氣衰者爲狂。

內經曰血氣者人之神血虛則覓游氣虛則覓散血氣既虛則精神不能統御覓覓故使邪哭而覓覓不安也心藏神心虛則覓覓不能隨神往來應精出入合目則覓覓飛揚故畏合目也夢遠行者

正精神離散。寃鬼妄行之謂。內經言重陽者狂。重
陰者癲。此陰氣衰者爲癲。陽氣衰者爲狂。似與彼
異。然經亦有上實下虛。爲厥癲疾。陽重脫者易狂。
則知陰陽俱虛。皆可爲癲。爲狂也。

脾中風者。翕翕發熱。形如醉人。腹中煩重。皮目瞶瞶。
而短氣。

風爲陽邪。故中風必翕翕發熱。脾主肌肉四肢。風
行於肌肉四肢之間。則身體懈惰。四肢不收。故形

如醉人。腹爲陰。陰中之至陰脾也。故腹中煩重。內經曰。肌肉蠕動。命曰微風。以風入於中。搖動於外。故皮目爲之瞤動。腹中煩重。隔其息道。不能達於腎肝。故短氣也。

脾死藏。浮之大堅。按之如覆盂。索索狀如握者死。內經言死脾脈來。銳堅如鳥之喙。如鳥之距。如屋之漏。如水之流。皆形容其將絕之狀。今但浮之大堅。按之如覆盂。此外實中空之象也。索索握者。其

藏之氣不守也故死。

跌陽脈浮而澹。浮則胃氣強。澹則小便數。浮澹相搏。大便則堅。其脾爲約。麻子仁丸主之。

浮爲陽盛。陽盛則胃能消穀。澹爲陰虛。陰虛則胃無津液。而小便偏滲。故大便卽堅也。麻子仁丸用以下堅潤燥。

麻子仁丸方

麻子仁 二升
芍藥 半斤
枳實 一斤

大黃 一斤

厚朴 一尺

杏仁 一升

右六味末之。煉蜜和丸。如梧子大。飲服十丸。日三。以知爲度。

內經曰。脾爲孤藏。中央土。以灌四旁。爲胃而行津液。胃熱則津液枯而小便又偏滲。大腸失傳送之職矣。內經曰。燥者濡之。潤以麻子。芍藥杏仁。結者攻之。下以大黃枳實厚朴。共成潤下之劑。

胃着之病。其人身體重。腰中冷。如坐水中。形如水狀。

反不渴。小便自利。飲食如故。病屬下焦。身發汗。自衣裏冷濕。久久得之。腰以下冷。痛。腹重。如帶三千錢。甘薑苓朮湯主之。

此腎著於寒濕也。內經曰。傷於濕者。下先受之。寒濕著於下焦。故身體重。甚則冷痛。腹重。如帶五千錢也。腰者腎之府。腎寒則腰中冷。如坐水中。形如水狀。而實非水也。腎虛當引水自救。今寒濕著於腎。是以不渴。不渴則無停飲。而小便自利。小便利。

金匱要略卷中
則寒濕不淫於脾。脾土不傷。故飲食如故。此證因
疲勞。玄府開。汗出衣冷。濕久久則寒濕之氣從而
薄腎。故爲腎着也。

甘草乾薑茯苓白朮湯方

甘草 白朮 各二兩
乾薑

茯苓 各四兩

右四味。以水五升。煮取三升。分溫三服。腰中節
溫。

白朮茯苓去濕而伐腎邪。甘草乾薑溫中而發陽。
腎。

腎死藏。浮之堅。按之亂如轉丸。益下入尺中者死。

腎藏死。浮之堅。與內經辟辟如彈石曰腎死。同意。
皆堅之象也。按之則亂如轉丸。下人尺中者。此陰
陽離決之狀也。故死。以上真藏與內經互有異同。
然得非常之脉。必爲非常之病。若未病者必病進。
已病者必死。總之脉無胃氣。現於三部中。脉象形

容不一也。

問曰。三焦竭部。上焦竭善噫。何謂也。師曰。上焦受中焦氣未和。不能消穀。故能噫耳。下焦竭卽遺溺失便。其氣不和。不能自禁制。不須治。久則愈。

竭。虛也。經曰。三焦不歸其部。上焦不歸者。噫而酢吞。中焦不歸者。不能消穀引食。下焦不歸者。則遺洩。上焦。胃上口也。中焦。脾也。脾善噫。脾不和。則食息迫逆於胃口而爲噫也。內經曰。膀胱不約爲遺。

溺下經曰虛則遺尿其氣不和則溲便不約故遺
失而不能自禁制不須治之久則正氣復而自愈
師曰熱在上焦者因欬爲肺痿熱在中焦者則爲堅
熱在下焦者則尿血亦令淋秘不通大腸有寒者多
鶩溇有熱者便腸垢小腸有寒者其人下重便血有
熱者必痔。

熱在上焦者經所謂肺痿吐涎沫熱在中焦者經
所謂大滿大實堅有燥屎熱在下焦者經所謂小

便淋瀝。小腹甚鞭。小便則尿血也。三焦結熱爲病者如此。驚性寒。從無鞭糞。驚澹。卽鴨澹也。大腸屬燥金。金寒則水穀不分。故驚澹也。若大腸爲熱鬱滯。則下稠粘垢濁之物。卽下利便膿血也。內經曰。結陰者。便血一升。再結二升。三結三升。又有陰寒爲病。下利膿血者。而用桃花湯以溫澁。乃下焦虛寒。寒傷血分。腸胃不固。則下重便血。亦有寒也。小腸屬火。膏粱之人。數食甘肥。甘肥熱毒積於小腸。

注於肛門結而爲痔矣。

問曰病有積有聚有聚氣何謂也。師曰積者藏病也。終不移。聚者府病也。發作有時。展轉痛移。爲可治。聚氣者脇下痛。按之則愈。復發爲聚氣。諸積大法。脈來細而附骨者。乃積也。寸口積在胸中。微出寸口。積在喉中。關上積在臍傍。上關上積在心下。微下關積在少腹。尺中積在氣衝。脈出左。積在左。脈出右。積在右。脈兩出。積在中央。各以其部處之。

難經曰。病有積有聚。何以別之。然積者。陰氣也。聚者。陽氣也。故陰沉而伏。陽浮而動。氣之所積名曰積。氣之所聚名曰聚。故積者。五藏所生。聚者。六府所成也。積者。陰氣也。其始發有常處。其病不離其部。上下有所終止。左右有所窮處。聚者。陽氣也。其始發無根本。上下無所留止。其痛無常處。故謂之聚。以是別知積聚也。瘵氣者。瘵。飪之邪也。瘵。飪之邪。留於脾胃。其氣則橫連募原。以脾之大絡布脇。

而脇下章門穴爲脾之募故脇下痛按之榮氣散則愈不按則復發也細而附骨沉脉也邪氣稽留不去息而成積故脉附骨也內經曰前以候前後以候後上竟上者胸喉中事也下竟下者少腹腰股膝脛足中事也故仲景以寸關尺上下左右別積聚之所在

痰飲欬嗽病脉證并治第十二

問曰夫飲有四何謂也師曰有痰飲有懸飲有溢飲

有支飲。問曰。四飲何以爲異。師曰。其人素盛。今瘦。水走腸間。漚漚有聲。謂之痰飲。飲後水流在脇下。欬唾引痛。謂之懸飲。飲水流行。歸於四肢。當汗出而不汗出。身體疼重。謂之溢飲。欬逆倚息。氣短不得卧。其形如腫。謂之支飲。

聖濟總錄曰。三焦者。水穀之道路。氣之所終始也。三焦調適。氣脉平勻。則能宣通水液。行入於經。化而爲血。灌溉周身。若三焦氣塞。脉道壅閉。則水飲

停滯不得宣行聚成痰飲爲病多端又因脾土不能宣達致水飲流溢於中布散於外甚則五藏受病也故內經曰土鬱之發飲發於中以其性流行不常治法亦有汗下溫利之異痰飲者何以平人水穀之氣入於胃變化精微以充肌肉則形盛今不能變化精微但化而爲痰飲此其所以素盛今瘦故水走腸間漚漚作聲也懸飲者以飲水後水偏流於脇下懸於肝經部分肝脉入肺中故一

欬一唾必相引而痛也。溢飲者以飲入於胃。當上輸於脾。脾當散精上歸於肺。則能通調水道。今脾失宣化之令。水竟流溢於四肢。在四肢可汗而泄。以其當汗不汗。則水飲留於肌膚脉絡之中。故身體疼重也。支飲者支散於上焦心肺之間。寒飲之氣薄於肺。則欬逆倚息。薄於心。則短氣不得卧。其形若腫。則水飲又支散於外。故謂之支飲也。

痰飲脉經千金翼俱作淡飲。當以淡飲爲是。若痰

飲則稠粘不能走腸間漚漚作聲也。

水在心。心下堅築短氣惡水不欲飲。

水停心下。甚者則悸。微者短氣。堅築悸狀也。火惡水。故惡水不欲飲。

水在肺。吐涎沫欲飲水。

聯綿不斷者曰涎。輕浮而白者曰沫。涎者津液所化。沫者水飲所成。釀於肺經則吐。吐多則津液亦乾。故欲飲水。

水在脾少氣身重。

脾惡濕。水飲濕類也。濕勝則土不能生金。故少氣。脾主身之肌肉。故身重也。

水在肝脇下支滿噎而痛。

肝脉布脇肋。故脇下支滿。水在肝。則條達之性爲水鬱。其氣上走頑頰。至畜門而出鼻孔。因作噎也。噎則痛引脇肋。故噎而痛。運氣有濕鬱其熱作噎。此亦其義。

水在腎心下悸。

水在腎則腎氣凌心故築築然悸也。

夫心下有留飲其人背寒冷如手大。

內經曰背爲陽陽中之陽心也諸陽受氣於膈中而轉行於背。心下有留飲則陽氣抑遏而不行故背寒冷如手大者言其不盡寒也。

留飲者膈下痛引缺盆欬嗽則轉甚。

缺盆者五藏六府之道故飲留於膈下而痛上引

缺盆引缺盆則欬嗽。欬嗽則痛引脇下而轉甚。此

屬懸飲。

轉甚一本作輒已未有欬嗽而脇下痛引缺盆輒愈也。

胸中有留飲其人短氣而渴四肢歷節痛。

胸中者屬上焦也。今爲留飲隔礙則氣爲之短。津

液不能上潮則口爲之渴也。飲者濕類也。流於關

節故四肢歷節痛也。

脉沉者有留飲。

經曰脉得諸沉者當責有水。故脉沉者爲水飲。

膈上病。痰滿喘欬吐。發則寒熱背痛腰疼。目泣自出。其人振振身瞤。劇必有伏飲。

痰飲留於膈。則令人喘欬吐。發於外。則令人寒熱背痛腰疼。欬甚。則肺葉舉而目泣出。喘甚。則息搖肩而振振身瞤。如此劇者。必有伏飲。

夫病人飲水多。必暴喘滿。凡食少飲多。水停心下。甚者則悸。微者短氣。

飲水多。則水氣泛溢於胸膈。必暴喘滿也。凡人食

少飲多則胃土不能游溢精氣甚者必停於心下而爲悸微者則填於胸膈而爲短氣也。

脉雙弦者寒也皆大下後裏虛脉偏弦者飲也。

大下後裏虛則脉雙弦痰飲留於脇下則脉偏弦是弦爲肝脉而證則懸飲也下文曰欬家其脉弦爲有水十棗湯主之又曰脉沉而弦者懸飲內痛又曰肺飲不弦則弦脉爲懸飲無疑矣。

肺飲不弦低苦喘短氣。

懸飲脉弦。肺飲脉不弦。肺飲卽支飲也。以水飲支散於上焦則喘。喘甚則氣促。故有苦喘短氣。支飲亦喘而不能卧。加短氣其脉平也。

寒飲射肺則喘息短促。故人喘甚則不能卧也。水飲支散於膈上必無沉弦之脉。故其脉平。平之爲言浮也。是肺之本脉也。

病痰飲者當以溫藥和之。

素盛今瘦則爲痰飲。法當溫之。則寒飲自散。

心下有痰飲。胸脇支滿。目眩。苓桂朮甘湯主之。

心下有痰飲。卽支飲也。散於上焦。則胸脇支滿。支滿。則隔礙清氣。不得上通於頭目。故目眩也。經曰。心下有支飲。其人苦眩冒。用苓桂朮甘湯利水飲。茯苓桂枝白朮甘草方。

茯苓

四兩

桂枝

白朮

各三兩

甘草

二兩

右四味。以水六升。煮取三升。分溫三服。小便則

利

脾胃虛則水穀化爲痰飲白朮去濕健脾以爲君
甘草和胃下氣以爲臣茯苓淡滲以爲佐桂枝宣
導以爲使使小便利而痰飲去

夫短氣有微飲當從小便去之苓桂朮甘湯主之腎
氣丸亦主之腎氣丸方見婦人雜病中

苓桂朮甘湯利小便藥也故短氣微飲者主之腎
氣丸亦主之者以脾胃喜溫而惡寒方中附子桂

枝之辛熱。可以溫脾逐飲。茯苓澤瀉之甘鹹。可以通利水道。如虛勞小便不利。轉胞不得溺者。皆用之也。

病者脉伏。其人欲自利。利反快。雖利。心下續堅滿。此爲留飲欲去故也。甘遂半夏湯主之。

寒飲留於中。則脉伏。自利者。水飲行也。雖自利。而心下續堅滿者。以舊飲漸去。而新飲續生。故與甘遂半夏湯以逐其水飲。

甘遂半夏湯方

甘遂

大者三枚

半夏

十二枚以水一升煮取半升去渣

芍藥

五枚

甘草

如指大一枚

右四味以水二升煮取半升去滓以蜜半升和藥汁煎取八合頓服之

留者行之用甘遂以決水飲結者散之用半夏以散痰飲甘遂之性直達恐其過於行水緩以甘草白蜜之甘收以芍藥之酸雖甘草甘遂相反而實

有以相使此

酸收

約之之法也。靈樞經曰：約方猶

約囊，其斯之謂歟。

脉浮而細滑傷飲。

脉浮爲病在上焦，細滑爲水飲停蓄。

脉弦數有寒飲，冬夏難治。

脉弦爲懸飲，脉數爲虛，故曰寒飲。若以數爲熱，則

方書未見有熱飲也。夫懸飲在脇下，肝之部分，春

則肝木自旺，是懸飲能行。秋則肺金制木，是懸飲

可去。今但言冬夏難治。則春秋易治可知矣。夏者
伏陰在內。懸飲祇有十棗湯下之之法。若在夏月
而下之。寧不損其脾陰。則土愈不制水而泛濫矣。
冬者伏陽在內。萬物閉塞。無擾乎陽。若冬月而下
之。寧不伐其天和。則腎不主五液而飲愈壅滯矣。
此所謂冬夏難治也。

脉沉而弦者。懸飲內痛。

沉爲水飲。弦爲肝脉。此飲留於脇下而成懸飲。懸

飲者欬唾引痛故曰懸飲內痛

病懸飲者十棗湯主之

十棗湯方

芫花熬

甘遂

大戟各等分

右三味搗篩以水一升五合先煮肥大棗十枚取八合去滓內藥末強人服壹錢匕羸人服半錢平旦溫服之不下者明日更加半錢得快之後糜粥自養

本草云通可以去滯。芫花甘遂大戟之類是也。以三味過於利水。佐大棗之甘以緩之。則土有隄防。而無崩潰暴決之禍。

病溢飲者。當發其汗。大青龍湯主之。小青龍湯亦主之。

內經曰溢飲者。渴暴多飲。而易入肌膚腸胃之外也。以其病屬表。故可大小青龍湯以發汗。

大青龍湯方

麻黃

六兩去節

桂枝

二兩去皮

甘草

二兩炙

杏仁

四十箇去皮尖

生薑

三兩

大棗

十二枚

石膏

如雞子大碎

右七味以水九升。先煮麻黃減二升。去上沫。內諸藥煮取三升。去滓。溫服一升。取微似汗。汗多者溫粉粉之。

上文曰當汗出而不汗出。故爲溢飲。大青龍辛甘之劑。用以發散水飲。取其微似有汗。汗多則正氣

虛故以溫粉粉之。小青龍湯去石膏見肺痿

膈間支飲其人喘滿心下痞堅面色黧黑其脈沉緊。得之數十日醫吐下之不愈。木防已湯主之。虛者即愈。實者三日復發。復與不愈者宜木防已湯去石膏加茯苓芒硝湯主之。

飲浮於心下膈間其氣不通則喘滿痞堅黧黑者。水飲之色見於面也。脈沉緊者沉爲飲緊爲寒也。得之數十日則支飲甚而正氣虛醫吐之徒虛其

陽下之徒虛其陰故不愈也。水防已湯者補脾氣而散飲故虛者得之卽愈實者亦暫愈而復發以舊飲未去而新飲續停故復發不愈以其實也。

宜水防已湯去石膏加茯苓芒硝以下水飲。

水防已湯方

水防已

三兩

石膏

十二枚

桂枝

二兩

人參

四兩

右四味以水六升煮取二升分溫再服。

防已利大小便石膏主心下逆氣桂枝宣通水道
人參補氣溫中正氣王則水飲不待散而自散矣
加芒硝之鹹寒可以與痞堅茯苓之甘淡可以滲
痰飲石膏辛寒近於解肌不必雜於方內故去之
於前方去石膏加芒硝三合茯苓四兩取微利
心下有支飲其人苦冒眩澤瀉湯主之。

內經曰清陽出上竅支飲留於心膈則上焦之氣
濁而不清清陽不能走於頭目故其人苦眩冒也

金匱要略卷之五
澤瀉湯方

澤瀉 五兩

白朮 二兩

右二味以水二升煮取一升分溫再服。

白朮之甘苦以補脾則痰不生澤瀉之甘鹹以入腎則飲不蓄小劑以治支飲之輕者。

支飲胸滿者厚朴大黃湯主之。

支飲之重者則胸滿厚朴大黃湯以消胸滿。

厚朴大黃湯方

厚朴 一尺

大黃 六兩

枳實 四枚

右三味以水五升煮取二升分溫再服。

大黃下痰逐飲爲君厚朴消痰除滿爲臣枳實去
胸脇痰痞爲佐此小承氣湯也。但分兩殊耳。

支飲不得息葶藶大棗瀉肺湯主之。方見肺癰

不得息者水飲迫肺也。用葶藶大棗湯以瀉肺。

嘔家本渴者爲欲解。今反不渴。心下有支飲故也。
小半夏湯主之。

金匱要略
先嘔却渴此爲欲解若嘔而不渴則有寒飲在膈
間作嘔故不渴也與小半夏湯以散之

小半夏湯方

半夏 一升

生薑 半斤

右二味以水七升煮取一升半分溫再服。

半夏消痰飲生薑下逆氣氣下飲消其嘔自止。

并主

諸嘔吐穀
不得下

腹滿口舌乾燥此腸間有水氣已椒蘆黃丸主之。

痰飲留於中則腹滿水穀入於胃但爲痰飲而不爲津液故口舌乾燥也上證曰水走腸間漚漚有聲故謂之痰飲此腸間有水氣亦與痰飲不殊故用此湯以分消水飲

防已椒目葶藶大黃丸方

防已

椒目

葶藶
熬

大黃
各一兩

右四味末之蜜丸如梧子大先食飲服一九日

三服稍增。口中有津液。渴者加芒_小半兩。

此水氣在小腸也。防已椒目導飲於前。清者得從小便而出。大黃葶藶推飲於後。濁者得從大便而下也。此前後分消。則腹滿減而水飲行。脾氣轉而津液生矣。若渴則甚於口舌乾燥。加芒硝佐諸藥。以下腹滿而救脾土。

卒嘔吐。心下痞。膈間有水。眩悸者。半夏加茯苓湯主之。

於前小半夏湯方。加茯苓三兩。半夏用以去水。生薑用以止嘔。茯苓用以利水。三味相將。止嘔而治水飲。則眩悸自止。

假令瘦人。臍下有悸。吐涎沫而癰眩。此水也。五苓散主之。

腎邪凌心。則心下悸。自病則臍下悸。假令羸弱之人。腎氣素虛。腎主水。虛則水飲從而客之。則築築然作悸也。夫子病及母。水寒射肺。泛溢上焦。則清

道不利。腸間爲濁。是以吐涎沫而癰眩也。與五苓散以散水飲。

五苓散方

澤瀉一分 豬苓三分去皮 茯苓三分

白朮三分 桂二分去皮

右五味爲末。白飲服方寸匕。日三服。多飲煖水。汗出愈。

下經曰。諸有水者。腰以下宜利小便。腰以上當發

汗乃愈。臍下悸，下焦有水也。臍走腎，淡滲泄，澤瀉之。臍二苓之淡，所以伐腎邪而洩伏水。吐涎沫而羸眩，上焦有水也。辛能散，甘能發，桂味辛能解肌，朮味甘能發汗。是以多飲煖水取汗，亦桂枝湯啜粥以助藥力之法也。

欬家其脉弦爲有水，十棗湯主之。

脉弦爲懸飲，故用十棗湯下之。

夫有支飲家，欬煩胸中痛者，不卒死，至一百日或一

歲宜十棗湯。

飲留於膈上射肺則欬。乘心則煩。支飲祇有胸中滿。胸中痞。此胸中痛。則支飲之甚者也。若不卒死。或延至百日。或至一年。其水飲內着。故宜十棗湯下之。

久欬數歲。其脉弱者可治。實大數者死。其脉虛者必苦冒。其人本有支飲在胸中故也。治屬飲家。

欬久者其氣必虛。其脉必弱。脉病相應。故爲可治。

若實大數者。此邪盛正衰。脉病相逆。故死也。若欬而脉虛苦胃者。必有支飲。在胸中而令欬。不必治其欬。宜於飲家求之。

欬逆倚息不得卧。小青龍湯主之。青龍湯下已。多唾口燥。寸脉沉。尺脉微。手足厥逆。氣從少腹上衝胸咽。手足痺。其面翕熱如醉狀。因復下流陰股。小便難。時復冒者。與茯苓桂枝五味甘草湯。治其氣衝。衝氣卽低。而反更欬胸滿者。用桂苓五味甘草湯去桂。加乾

薑細辛以治其欬滿。欬滿卽止。而更復渴。衝氣復發者。以細辛乾薑爲熱藥故也。服之當遂渴。而渴反止者。爲支飲也。支飲者。法當冒。冒者必嘔。嘔者復內。半夏以去其水。茯苓桂枝五味甘草湯去甘草去桂。加細辛乾薑半夏湯主之。水去嘔止。其人形腫者。加杏仁主之。其證應內麻黃。以其人遂痺。故不內之。若逆而內之者。必厥。所以然者。以其人血虛。麻黃發其陽故也。若面熱如醉。此爲胃熱上衝。熏其面。加大黃以

利之。下已當作汗已

此證用小青龍湯下已。而飲未盡除。故出入加減。亦不外小青龍方也。支飲未盡。則多唾口燥。以其人內虛邪正錯雜。小青龍湯有麻黃。或過發其陽。致令寸沉尺微。手足厥冷。或痺不仁。故氣上衝胸咽。其面則翕然熱如醉狀。下流陰股。則不宜化小便。故小便難。先與茯苓桂枝五味甘草湯以治其氣衝。其衝氣即低。不上衝咽喉。不下流陰股矣。小

便難。則水飲續積。故時復冒。冒知水飲未散。而更發欬胸滿者。用桂苓五味甘草湯。去桂加乾薑細辛。以治其欬滿。肺得辛溫。則欬滿卽止。然乾薑細辛熱藥。當發衝氣而遂作渴。反不渴者。則知膈上有支飲也。飲則必冒。寒則必嘔。故內半夏以去水。水去嘔止。猶有餘邪散湯於肌膚。其人形腫。加杏仁之輕劑以散之。形腫當內麻黃。以小青龍湯有麻黃。其人已虛。得之卽手足冷痺。今其人又瘳。故

不內也。若妄內之而發其陽。其入血虛。則又如前之厥冷矣。前證從少腹上衝胸咽。面熱如醉。爲虛陽散於頭面。此則因前後用熱劑太過。積熱於胃。故面熱如醉。非翕然之熱也。加大黃以下胃熱。

桂苓五味甘草湯方

茯苓

四兩

桂枝

四兩 去皮

甘草

炙三兩

五味子

半升

右四味。以水八升。煮取三升。去滓。分溫三服。

桂苓五味甘草湯去桂加乾薑細辛湯方

茯苓

四兩

甘草

乾薑

細辛

各三兩

五味子

半升

右五味以水八升煮取三升去滓溫服半升日
三。

桂苓五味甘草湯去甘草去桂加乾薑細辛半

夏湯方

茯苓

四兩

細辛

乾薑

各二兩

五味子

半夏

各半升

右五味。以水八升。煮取三升。去滓。溫服半升。日三。

苓甘五味加薑辛半夏杏仁湯方

於前湯加杏仁半升。去皮尖。餘依前法煎服。

苓甘五味加薑辛半杏大黃湯方。

於前方加大黃三兩。餘依前法煎服。

先渴後嘔。爲水停心下。此屬飲家。小半夏茯苓湯主

之。

先嘔却渴。水飲散也。先渴却嘔。水飲停也。與小半夏茯苓湯以散水飲。

消渴小便利淋病脉證并治第十三

厥陰之爲病。消渴。氣上衝心。心中疼熱。饑而不欲食。食卽吐衄。下之利不止。

厥陰何以爲消渴。以厥陰屬木。少陰屬木。木爲水之子。子能令母虛。厥陰之邪熱盛。則腎水爲之消。

腎消則引水自救故消而且渴消不爲水止也氣上撞心心中疼熱者心屬火水火通氣肝氣通於心也饑不能食者胃司食而屬土木邪甚土受制也吐衄者衄在胃中無食則靜聞食臭則出也下之利不止者邪屬厥陰下則反虛陽明陽明屬土土虛則木益賊其所勝也

寸口脉浮而遲浮卽爲虛遲卽爲勞虛則衛氣不足勞則榮氣竭。

浮主表浮則衛氣虛遲主裏遲則榮氣竭今寸口
得浮而遲則肺氣不能宣化精微治節百脉致榮
衛虛竭此上消脉也。

趺陽脉浮而數浮卽爲氣數卽消穀而大堅氣盛則
溲數溲數卽堅堅數相搏卽爲消渴。

趺陽胃脉也內經曰三陽結謂之消胃與大腸謂
之三陽以其熱結於中則脉浮而數內經又曰中
熱則胃中消穀是數卽消穀也氣盛熱氣盛也穀

消熱盛則水偏滲於膀胱故小便數而大便鞭胃
無津液則成消渴矣此中消脉也。

趺陽脉數胃中有熱卽消穀引食大便必堅小便卽
數。此條原在淋中今次之。

靈樞經曰胃中熱則消穀故熱則消穀引食大便
必堅也。大便堅則津液偏滲故小便卽數。

男子消渴小便反多以飲一斗小便一斗腎氣丸主
之。方見婦人雜病。

小便多則消渴內經曰飲一溲二者不治今飲一溲故與腎氣丸治之腎中之氣猶水中之火地中之陽蒸其精微之氣達於上焦則雲升而雨降上焦得以如霧露之溉肺金滋潤得以水精四布五經并行斯無消渴之患今其人也攝養失宜腎水衰竭龍雷之火不安於下但炎於上而刑肺金肺熱葉焦則消渴引飲其飲入於胃下無火化直入膀胱則飲一斗溺亦一斗也故用桂附辛熱引

真火以歸原地黃純陰將真水以滋腎則陽光行於地下而霧露自降於中天何消渴之有此屬下消。

脉浮小便不利微熱消渴者宜利小便發汗五苓散主之。

脉浮爲有表邪故令有微熱也小便不利則土乾水涸故消渴消渴則飲水多又恐其停飲故與五苓散利小便發汗。

渴欲飲水。水入則吐者。名曰水逆。五苓散主之。方見痰飲
內有停飲而欲飲水。飲入則水與水相搏。必拒格而吐。名曰水逆。五苓散以利水飲。
渴欲飲水不止者。文蛤散主之。

文蛤散方

文蛤 五兩

右一味。杵爲散。以沸湯五合。和服方寸匕。

飲水不止者。則水飲必停。文蛤之鹹以潤下而止。

渴。一味獨行者取其氣專精入膀胱而利小便也。

淋之爲病小便如粟狀小腹弦急痛引臍中。

內經曰膀胱不利爲癰不利則熱鬱於膀胱煎熬便溺小便則如粟狀卽今之石淋是也。夫肝主疎泄。癰閉則失其疎泄之性故小腹弦急而痛引臍中。

淋家不可發汗。發汗必便血。

膀胱蓄熱則爲淋。發汗以迫其血。血不循經。結於下焦。又爲便血。

小便不利者。有水氣。其人苦渴。栝樓瞿麥丸主之。

小便不利。則水氣客於下焦。客於下焦。則上焦苦渴。渴則益增其水。故與是湯止渴以利水。

栝樓瞿麥丸方

栝樓根 二兩

茯苓

薯蕷 各三兩

附子 一枚炮

瞿麥 一兩

右五味末之煉蜜丸。梧子大。飲服三丸。日三服。不知增至七八丸。以小便利。腹中溫爲知。

薯蕷栝樓潤劑也。用以止渴生津。茯苓瞿麥利劑也。用以滲泄水氣。膀胱者。州都之官。津液藏焉。氣化則能出矣。佐附子之純陽。則水氣宣行。而小便自利。亦腎氣丸之變制也。

小便不利。蒲灰散主之。滑石白魚散。茯苓戎鹽湯并主之。

蒲灰散方

蒲灰 七分

滑石 三分

右二味。杵爲散。飲服方寸匕。日三服。

熱鬱於血分者。亦令小便不利。滑石蒲灰利小便
消滯血藥也。

滑石白魚散方

滑石 二分

亂髮 二分燒

白魚 二分

右三味。杵爲散。飲服半錢匕。日三服。

滑石利小便。亂髮主五淋。白魚利水道。同治小便不利。

茯苓戎鹽湯方

茯苓

半斤

白朮

二兩

戎鹽

彈丸大一枚

右三味以水五升。煮取三升。分溫三服。

茯苓淡滲以伐腎邪。白朮燥濕以補脾土。戎鹽潤下以利水道。以上三方。臨病之工。審其所屬者用之。

渴欲飲水。口乾舌燥者。白虎加人參湯主之。

方見中

胃熱則津液乾。故渴欲飲水。口乾舌燥。用白虎湯加人參。除胃熱而生津液。

脉浮發熱。渴欲飲水。小便不利者。猪苓湯主之。

脉浮發熱。熱在表也。渴欲飲水。熱在裏也。裏有熱。則能消水。反停留而小便不利。故用猪苓以利小便。

猪苓湯方

猪苓 去皮

茯苓

阿膠

滑石

澤瀉 各一兩

右五味以水四升。先煮四味取二升。去滓。內膠。洋消。溫服七合。日三服。

茯苓猪苓之淡用以滲泄。滑石阿膠之甘用以滑竅。澤瀉之鹹用以潤下。

論曰。渴者與猪苓湯。又曰。口舌乾燥。已椒蔎黃丸主之。夫猪苓湯利水道走津液。而反與渴者。是益

其疾也。已椒蘆黃。亦走津液之物也。似法之不協於理。而藥之睽於病者。何也。殊不知陰陽之道。陽先必陰。後陽上必陰下。此理之必然。而仲景之法。內有飲者。外必渴。飲者。水也。所以必用五苓治之者。利其水也。夫水積於下。則火無所歸避。而炎上其渴也。固宜水去。則火就位。何渴之有也。

水氣病脉證并治第十四

師曰。病有風水。有皮水。有正水。有石水。有黃汗。風水

其脉自浮外證骨節疼痛惡風皮水其脉亦浮外證
腑腫按之沒指不惡風其腹如鼓不滑當發其汗正
水其脉沉遲外證自喘石水其脉自沉外證腹滿不
喘黃汗其脉沉遲身發熱胸滿四肢頭面腫久不愈
必致癰膿

風水與皮水相類屬表正水與石水相類屬裏但
風水惡風皮水不惡風正水自喘石水不喘爲異
耳自唐以來復有五水十水之說皆由腎不主五

液脾不能行水致津液充郭上下溢於皮膚則水病生矣風水得之於風故脉浮骨節者血氣之所注水搏於其間則疼痛風開其玄府則惡風也皮水者水氣客於皮膚之間皮膚屬表故脉亦浮也胃脉在足水氣乘土則爲附腫也按其腫上則水散故按之陷下沒指也不因於風則不惡風也帝曰膚脹何以候之岐伯曰寒氣客於皮膚之間鬱於腠理故按之堅裏氣不足故按之陷下按之無裏氣故按之軟而不堅腹大故腹如鼓也外客於皮膚內不干

脾胃故不渴也。其在皮者汗而發之。故當發其汗。
正水者。靈樞經曰。胃足陽明之脉。所生病者。大腹
水腫。胃爲五藏六府之海。中央土以灌四旁。而腎
爲胃關。關門不利。故令聚水。此正經受病。故曰正
水。水在內則脉沉遲。水上溢則爲喘呼。故內經曰。
水病下爲跗腫。大腹上爲喘呼。是以外證自喘也。
石水者。外不散於皮膚。上不凌於心肺。但結於腹
中而爲腹滿。故不喘也。以其冰堅如石。故曰石水。

黃汗者。脉亦沉。雖與正水相似。但其汗沾衣。色正黃。如檗汁。爲異耳。其病得之汗出入水中浴。水從汗孔入。客於表。則身熱。客於裏。則胸滿也。四肢者。諸陽之本。頭面者。諸陽之首。黃汗之病。乃陽氣虛。而水氣勝。故四肢頭面腫。如此久久不愈。則榮血不行。逆於肉理。乃生癰腫也。

脉浮而洪。浮則爲風。洪則爲氣。風氣相搏。風強則爲隱疹。身體爲痒。痒爲泄風。久爲痂癩。氣強則爲水難。

以俛仰。風氣相擊。身體洪腫。汗出乃愈。惡風則虛。此爲風水。不惡風者。小便通利。上焦有寒。其口多涎。此爲黃汗。

風令脉浮。故浮爲風。氣爲水母。故洪爲氣。氣者。水氣也。經曰。邪入於經。則身痒而隱疹。靈樞經曰。風邪搏於皮膚之間。其氣外發。腠理開。毫毛搖。氣往來行。則爲痒。是以痒爲泄風也。久久不愈。則風邪留於血脉之中。皮膚瘍潰。而爲痂癩矣。形盛於外。

爲氣強。內經曰。津液充郭。其魄獨居。卽氣強之意也。故氣強則爲水。水溢於皮膚之中。必俛仰爲之不利。若風水相搏。流於經絡。溢於肌表。則身體又洪腫矣。在表者可汗而泄。故汗出乃愈。風傷於衛。則衛虛。故曰惡風則虛。此爲風水。然黃汗亦身腫。但不因於風。則不惡風。不因於水。則小便通利。因於水。從汗孔入。水寒之氣。但客於上焦。故令上焦有寒。寒不能以攝其津液。則口多涎。此黃汗風水。

之證有別如此。

寸口脉沉滑者。中有水氣。面目腫大有熱。名曰風水。視人之目。裹上微擁如蠶。新卧起狀。其頸脉動。時時欬。按其手足上陷而不起者。風水。

沉者。就下之性。滑者。流行之象。故沉滑者。中有水氣也。面腫曰風。風鬱於經則熱。故面目腫大有熱。名曰風水。內經曰。諸有水者。微腫先見於目下也。水者。陰也。目下亦陰也。腹者至陰之所居。故水在

腹者必使目下腫也。頸脉人迎脉也。水邪干土則
頸脉動。水之本在腎。水之標在肺。故時時欬也。靈
樞經曰。水始起也。目窠上微腫。如新卧起之狀。其
頸脉動。時欬。以手按其腹。隨手而起。此屬水脹。如
按水囊者。必隨手而起。今風水搏於手足。跗屬肌
肉之間。按而散之。猝不能聚。故陷下而不起也。

太陽病。脉浮而緊。法當骨節疼痛。反不疼。身體反重
而酸。其人不渴。汗出卽愈。此爲風水惡寒者。此爲極

虛發汗得之。渴而不惡寒者。此爲皮水。身腫而冷。狀如周痺。胸中空。不能食。反聚痛。暮躁不得眠。此爲黃汗。痛在骨節。欬而喘。不渴者。此爲脾脹。其狀如腫。發汗卽愈。然諸病此者。渴而下利。小便數者。皆不可發汗。

太陽傷寒。則脉浮緊。故法當骨節疼痛。今得傷寒。脉而身不疼痛。反重而酸者。此風水外勝也。不渴者。風水未干裏也。以其外勝。故汗出卽愈。風傷於

衛則表虛。惡寒者。表虛而又發汗也。皮水不因於風。則腠理緻密。故不惡寒。上章言皮水不渴。今水氣外留於皮。內薄於肺。亦令渴也。周痺者。風寒濕氣客於分肉之間。真氣不能周。故曰周痺。今身腫而冷。亦似真氣不能周。但胸中窒。不能食而聚痛。暮躁不得眠。此異於周痺。故爲黃汗證也。若水氣外流於關節。則骨節痛。內薄於上焦。則爲喘。爲欬也。不渴者。土不能制水。水邪泛溢也。以脾主身之

肌肉故爲脾脹脾脹者其狀亦腫以其在肌肉之間故發其汗卽愈以上四證俱脉浮緊皆當汗出而解若渴而下利小便數者則津液不足故不可發汗也。

裏水者一身面目黃腫其脉沉小便不利故令病水。假如小便自利此亡津液故令渴也越婢加朮湯主之。方見下

裏有水則脉沉小便不利溢於表則一身面目黃

隨故與越婢加木湯以散其水。若小便自利，此亡津液而渴，非裏水之證，不用越婢湯也。越婢加木湯當在故令病水之下。

趺陽脈當伏。今反緊，本自有寒，疝瘕腹中痛。醫反下之，下之則胸滿短氣。趺陽脈當伏，今反數，本自有熱消穀，小便數。今反不利，此欲作水。

水邪乘土，則土敗。故水證者，趺陽脈當伏。今反緊者，緊爲寒。脾喜溫而惡寒，寒聚於中，則結疝瘕而

腹中作痛。夫寒。痼當溫之。反下之。則虛其胃。寒氣乘虛上逆。則胸滿而短氣也。趺陽脉當伏。今反數。數爲熱。經曰。熱則消穀而大便必堅。小便卽數。今小便反不利。則水無從出。故欲作水也。

寸口脉浮而遲。浮脉則熱。遲脉則潛。熱潛相搏。名曰沉。趺陽脉浮而數。浮脉卽熱。數脉卽止。熱止相搏。名曰伏。沉伏相搏。名曰水。沉則絡脉虛。伏則小便難。虛難相搏。水走皮膚。卽爲水矣。

寸口者。肺脉也。今脉得浮而遲。浮爲熱。遲爲潛。熱潛於表。名曰沉。故沉則絡脉虛。趺陽。胃脉也。今脉得浮而數。浮爲熱。數爲止。熱止於裏。名曰伏。故伏則小便難。小便難。則水不得外泄。乘其絡脉之空。虛而溢於肌表。卽爲水矣。

寸口脉弦而緊。弦則衛氣不行。卽惡寒。水不沾流。走於腸間。少陰脉緊而沉。緊則爲痛。沉則爲水。小便卽難。

寸口以候表。弦緊爲寒。寒則表氣不行。不能以衛肌膚。故惡寒。氣既不行。則水飲亦不宜。但走入腸間而爲水。少陰以候裏。緊沉亦爲寒。寒則水飲着於內而不流。故爲痛。爲水。小便亦爲難也。

脉得諸沉者。當責有水。身體腫重。

水溢則脉沉於裏而腫見於表。

水病脉出者死。

夫水留於中。傷脾胃而爲大腹。散於外。傷經絡而

爲洪腫水病何以脉出以脉絡經筋爲水浸漬則不能輸精微以行榮衛。符刻漏而維周身。但與水氣浮溢於肌表面而屈曲青紫可見。是中氣衰微榮衛斷絕之象。故靈樞經曰。鼓脹色蒼黃。腹筋起。其此類歟。

夫水病人目下有卧蠱。面目鮮澤。脉伏。其人消渴。內經曰。目窠微腫。如卧蠱起狀。曰水。又曰。諸有水者。微腫先見於目下也。上經曰。色鮮明者有留飲。

是鮮澤者爲水之色。脉伏者爲水之性。消渴者致水之由。

病水腹大小便不利。其脉沉絕者。有水。可下之。

腹大者爲水在裏。小便不利者爲水不行。是以脉亦沉絕也。故宜下之以去其水。

問曰。病下利後。渴飲水。小便不利。腹滿陰腫者。何也。答曰。此法當病水。若小便自利。及汗出者。自當愈。

病下利。則脾土衰而津液竭。故渴引飲而土又不

金匱要略卷之八 雜論
能制水故小便不利也。脾惡濕是以腹滿。腎主水
是以陰腫。此爲病水無疑。若小便利則水行汗出
則水散雖不藥而自亦愈矣。

心水者其身重而少氣不得卧煩而躁其入陰腫

內經曰心主身之血脉上經曰水在心心下堅築
短氣是以身重少氣也內經曰諸水病者不得卧
夫心屬火水在心則蒸鬱燔爍是以不得卧而煩
躁也心水不應陰腫以腎脉出肺絡心主五液而

司閉藏水之不行皆本之於腎。是以其陰亦腫也。肝水者其腹大不能自轉側。脇下腹痛。時時津液微生。小便續通。

肝屬木。其經則布脇肋。木乘土則脇下腹中皆痛。及腹大不能自轉側也。夫肝主踈泄。是以小便續通。腎無壅滯則津液得以上達。故內經曰。地氣上者屬於腎而生水液也。若脾水則小便不通。而津液亦不生矣。

肺水者其身體小便難時時鴨漉

肺主身之皮毛則身腫肺病則不能通調其水入於膀胱致小便難但走大腸而水穀不別故時時鴨漉

脾水者其腹大四肢苦重津液不生但苦少氣小便難

腹爲陰陰中之至陰脾也以至陰之藏而寒水乘之則腹脹大脾主四肢則四肢苦重也小便續通

則津液微生。今小便難。則五液壅滯。而脾又能制
腎。隔礙中焦。津液不能上達。下焦之氣不能上通。
則津液不生。并苦少氣也。

腎水者。其腹大。臍腫。腰痛。不得溺。陰下濕。如牛鼻上
汗。其足逆冷。面反瘦。

腎者。胃之關也。關門不利。故令聚水而生病。是有
腹大。臍腫之證也。腰者。腎之外候。故令腰痛。膀胱
者。腎之府。故令不得溺也。以其不得溺。則水氣不

得泄浸漬於辜囊而爲陰汗。流注於下焦而爲足冷。夫腎爲水藏。又被水邪。則上焦之氣血隨水性而下趨。故其人面反瘦。非若風水裏水之面目洪腫也。

師曰。諸有水者。腰以下腫。當利小便。腰以上腫。當發汗。乃愈。

內經曰。開鬼門。潔淨府。謂發汗利小便也。腰以上屬陽。汗之以開其鬼門。腰以下屬陰。利之以潔其

淨府。上下分消以去之。則水自不能容矣。

師曰。寸口脉沉而遲。沉則爲水。遲則爲寒。水寒相搏。跌陽脉伏。水穀不化。脾氣衰則鶩溇。胃氣衰則身腫。少陽脉卑。少陰脉細。男子則小便不利。婦人則經水不通。經爲血。血不利則爲水。名曰血分。

沉爲水。遲爲寒。水寒相搏。則土敗矣。是以胃之跌陽脉則伏。脾之水穀則不磨。脾衰則寒內着而爲鶩溇。胃衰則水外溢而爲身腫也。少陽者。三焦也。

內經曰三焦者決瀆之官。水道出焉。今少陽脉卑。則不能決瀆矣。在男子則小便不利。少陰者腎也。中藏經曰。腎者女子以包血。以其與衝脉并行。今少陰脉細。則寒氣客於胞門矣。在婦人則經水不通。經雖爲血。其體則水。況水病而血不行。其血亦化爲水。故名曰血分。

問曰。病者苦水。面目身體四肢皆腫。小便不利。脉之不言水。反言胸中痛。氣上衝咽。狀如炙肉。當微欬喘。

審如師言。其脉何類。師曰。寸口脉沉而緊。沉則爲水。緊則爲寒。沉緊相搏。結在關元。始時當微。年盛不覺。陽衰之後。榮衛相干。陽損陰盛。結寒微動。腎氣上衝。咽喉塞噎。脇下急痛。醫以爲留飲。而大下之。氣擊不去。其病不除。後重吐之。胃家虛煩。咽燥欲飲水。小便不利。水穀不化。面目手足浮腫。又與葶藶圓下水。當時如小差。食飲過度。腫復如前。胸脇苦痛。象若奔豚。其水揚溢。則浮欬喘逆。當先攻擊衝氣令止。乃治欬。

欬止其喘自差。先治新病。病當在後。

寸口脉沉而緊。沉爲水。緊爲寒。水寒之氣結於關元。當其少壯之時。陽氣正旺。雖有結寒。亦爲不覺。及至陽衰之後。榮衛亦虛。其陽則損。其陰則盛。關元結寒。乘其陽虛而動。腎中陽氣不能以勝陰寒。寒氣上衝。咽喉閉塞。脇下亦相引而急痛也。醫者不求其本。因寒水結在關元。見其標證。面目身體四肢皆腫。小便不利。以爲水飲而大下之。其衝氣

不爲下止。後重吐之。非惟衝氣不止。而大吐大下。復又損其胃而亡其津液。是以咽燥引飲也。吐下後其陽愈虛。則不能施行便溺。其寒愈勝。則不能消化水穀。是以小便不利。而水穀不化。面目手足猶然浮腫。復與葶藶丸下水。而浮腫小差。食飲過度。則脾胃復傷。腫復如前。其實水寒結於關元。而未散寒上衝。則胸脇苦痛。象若奔豚。水揚溢。則爲浮腫喘欬也。當先攻其寒。以療其衝逆。後乃治其

水以止其欬喘。

風水脉浮身重汗出惡風者防已黃耆湯主之。腹痛

加芍藥。治見濕病中

風勝則脉浮。水勝則身腫。風水搏於皮膚之間。開其玄府。是以汗出而惡風也。上經曰。惡風則虛。此爲風水。與黃耆甘草以固表。防已以療風水腫。白朮以逐皮間風水結腫。爲治風水表虛之劑。芍藥主邪氣腹痛。故腹痛加芍藥。

風水惡風。一身悉腫。脉浮不渴。續自汗出。無大熱。越婢湯主之。

此證風水勝於表。故一身悉腫。不屬於裏。故不渴。無熱也。惡風汗出。風淫所勝也。越婢湯者。發散風本之劑。

越婢湯方

麻黃 六兩

石膏 半斤

生薑 三兩

甘草 二兩

大棗 十五枚

右五味。以水六升。先煮麻黃去上沫。內諸藥煮取三升。分溫三服。惡風加附子一枚。炮

辛能散風。甘能勝水。越婢湯者。辛甘之劑。以發越脾氣。則在表之邪得汗而泄。開鬼門之法也。虛者惡風。故加附子。

越婢外臺作越脾。道經曰。脾之神多如嫉。婦人多妬。乃脾經受氣也。脾土寄旺無定形。而妬亦無定準。脾爲藏之卑。婢爲女之卑。脾之言婢。殆有義歟。

皮水爲病。四肢腫。水氣在皮膚中。四肢聶聶動者。防

已茯苓湯主之。

水氣在皮膚中。與正氣相搏。故四肢腫而聶聶動也。防已茯苓湯。以散皮中之水。

防已茯苓湯方

防已

三兩

黃耆

三兩

桂枝

三兩

茯苓

六兩

甘草

二兩

右五味。以水六升。煮取二升。分溫二服。

本草云。通可以去滯。防已之屬是也。以防已能利

九竅血脉關節。故以爲君。桂枝能通血脉發汗。故以爲臣。肺合皮毛。皮有木。則氣耗於外。故用黃耆甘草益氣以爲佐。茯苓淡滲以爲使。

裏水。越婢加朮湯主之。甘草麻黃湯亦主之。

裏水詳見上章。於越婢湯中加朮四兩。

甘草麻黃湯方

甘草 二兩

麻黃 四兩

右二味以水五升。先煮麻黃去上沫。內甘草煮。

取三升。溫服一升。重覆汗出。不汗再服。慎風寒。
裏有水而越於表。故用辛甘之劑以發汗。

水之爲病。其脈沉小屬少陰。浮者爲風。無水虛脹者
爲氣。水發其汗卽已。脈沉者宜麻黃附子湯。浮者宜
杏子湯。

腎主水。少陰能聚水而生病。故脈沉小屬少陰。浮
者屬風。無水虛脹者屬氣也。水病在表者發之。腰
已上者發之。故發其汗卽已。腎本爲水藏。而水之

性本寒。非附子不足以逐其寒。非麻黃不足以散其水。佐甘草以益脾。令土能勝水也。杏子湯未見麻黃附子湯方。

麻黃 三兩

甘草 二兩

附子 一枚炮

右三味。以水七升。先煮麻黃去上沫。內諸藥煮取二升半。溫服八分。日三服。

脈而皮水者。蒲灰散主之。方見消渴中。

皮水在皮膚中。脈則水氣浸淫於裏。故用蒲灰散。

以利小便。

問曰黃汗之爲病。身體腫。發熱。汗出而渴。狀如風水。汗沾衣。色正黃如燃汁。脉自沉。何從得之。師曰以汗出入水中浴。水從汗孔入得之。宜黃耆芍藥桂枝苦酒湯主之。

汗出則玄府開。入水浴。則淒滄之水寒。藏留於腠理。皮膚之中。則身腫發熱也。汗出沾衣如麤汁。則津液內竭。是以汗出而渴也。身腫蠲狀如風水。但

風水之脉不沉汗不黃口不渴爲異耳。上章言黃汗身腫而冷今身腫發熱上章言黃汗口多涎今口作渴以汗者心之液經曰汗出入水浴則水氣傷心今薄於皮膚則身腫發熱而渴傷於心則水寒之氣勝於上焦故有上焦多寒而口多涎身腫而冷胸中窒之證也則黃汗亦有表裏之分歟

黃耆芍藥桂枝苦酒湯方

黃耆 五兩

芍藥 三兩

桂枝 三兩

右三味以苦酒一升。木七升。相和煮取三升。溫服一升。當心煩。服至六七日乃解。若心煩不止者。以苦酒阻故也。

邪之所湊。其氣必虛。以其人汗出。則表氣本虛。浴之。則水氣乘虛而入。故用黃耆以固其衛。芍藥苦酒以收其榮。桂枝以散其水。如是。則發中有補。邪去正安矣。苦酒味酸。其氣澁。以收。故令人心煩。六七日乃解者。待其正氣復也。

黃汗之病。兩脛自冷。假令發熱。此屬歷節。食已汗出。又身常暮盜汗出者。此勞氣也。若汗出已反發熱者。久久其身必甲錯。發熱不止者。必生惡瘡。若身重汗出已輒輕者。久久必身瞶。瞶卽胸中痛。又從腰以上必汗出。下無汗。腰髀痠痛。如有物在皮中狀劇者。不能食。身疼重煩躁。小便不利。此爲黃汗。桂枝加黃耆湯主之。

濕就下而流關節。故黃汗病兩脛冷。若兩脛熱則

屬歷節之病。其食已汗出。爲胃氣外泄。暮而盜汗。爲榮氣內虛。又屬虛勞之證。二者俱汗出。皆非黃汗也。欲作黃汗之證。汗出已而熱不爲汗衰。反發熱而熱不止。薄於外則銷燦皮膚。故令身體枯燥。薄於裏則潰脉爛筋。故令生惡瘡也。夫濕勝則身重。汗出雖濕去身輕。而正氣未必不損。如此久久。必耗散諸陽。故身暈而腦痛。是以上焦陽虛。則腰以上汗出。下焦濕勝。而爲腰髀施痛。如有物在皮。

中狀也。劇則內傷於脾。而不能食。外傷肌肉。而身體疼重。若煩躁。小便不利。則水氣無從出。蘊蓄肌中。必爲黃汗。

桂枝加黃耆湯方

於桂枝湯方中。加黃耆二兩。餘如桂枝法。取微汗。

風能勝濕。桂枝生薑以散水邪。土能勝水。甘草大棗以益脾土。酸以收之。甘以緩之。黃耆芍藥之甘。酸以收斂其榮衛。溫覆取微汗而解也。

師曰。寸口脈遲而濇。遲則爲寒。濇爲血不足。跌陽脈

微而遲微則爲氣遲則爲寒寒氣不足則手足逆冷
手足逆冷則榮衛不利榮衛不利則腹滿腸鳴相逐
氣轉膀胱榮衛俱勞陽氣不通卽身冷陰氣不通卽
骨疼陽氣前通則惡寒陰氣前通則痺不仁陰陽相
得其氣乃行大氣一轉其氣乃散實則失氣虛則遺
溺名曰氣分。

脉遲爲寒。清爲無血微爲無氣寸口趺陽得此脉
者榮衛氣血俱虛爲水寒之氣所客也。夫榮衛氣

血之在於身與天同度與地合紀。今正氣虛而寒氣勝，則大氣失其常度，不能以溫四肢，亦不能以行榮衛。則榮衛之氣與水寒搏於腸間，而爲腹滿。腸鳴相逐，氣轉膀胱，知榮衛俱勞也。身冷者，陽不能以衛外，骨疼者，陽不能以溫內。唯其內外之陽已虛，縱衛氣前通於表，而猶惡寒。榮氣前通於表，而猶痺不仁者，此皆陰陽乖舛，致榮衛失其銜銓，必待陰陽相得，則榮衛之氣斯行，腹中之大氣斯

轉而腹滿腸鳴相逐之氣自散矣。氣散必從前後而去。是邪氣實則失氣於後。正氣虛則遺溺於前也。此章以明水在氣分之大義。以氣行則水寒之氣亦行。非下章結於心下爲盤爲杯也。

氣分。心下堅大如盤邊如旋杯。水飲所作。桂枝去芍藥。加麻黃附子細辛湯主之。

心下者。上焦之陽分也。故爲氣分。如盤如杯。皆水氣凝堅不散。故用辛甘大熱之劑以散寒去水。

桂枝去芍藥加麻黃附子細辛湯方

桂枝

三兩

生薑

三兩

甘草

二兩

大棗

十二枚

麻黃

細辛

各一兩

附子

一枚炮

右七味以水七升煮麻黃去上沫內諸藥煮取二升分溫三服當汗出如蟲行皮中即愈

心下堅大如盤邊如旋盤水飲所作枳實白朮湯主之

枳實白朮湯方

枳實 七枚

白朮 二兩

右二味以水五升煮取三升分溫三服腹中
中更即當散也。

上章如盤而復如盃是木凝堅之狀此證如盤而
不如盃是水飲散漫之狀也以其散漫於心下如
盤不必辛熱之劑以發之但用枳朮以散之得腹
中更而水自消矣

黃疸病脉證并治第十五

寸口脉浮而緩。浮則爲風。緩則爲痺。痺非中風。四肢
苦煩。脾色必黃。瘀熱以行。趺陽脉緊而數。數則爲熱。
熱則消穀。緊則爲寒。食卽爲滿。尺脉浮則傷腎。趺陽
脉緊則傷脾。風寒相搏。食穀卽眩。穀氣不消。胃中苦
濁。濁氣下流。小便不通。陰被其寒。熱流膀胱。身體盡
黃。名曰穀疸。額上黑。微汗出。手足中熱。薄暮卽發。膀
胱急。小便自利。名曰女勞疸。腹如水狀不治。心中懊

懷而熱不能食。時欲吐。名曰酒疸。

脉得浮緩者。必發黃。故傷寒脉浮而緩者。繫在太陰。太陰者。必發身黃。今浮爲風。緩爲痺。非外證之中風。乃風熱蓄於脾土。脾主四肢。故四肢苦煩。熱行於外。則發黃也。跌陽。胃脉也。數爲熱。緊爲寒。此胃中陰陽不分。清濁相干。寒熱混雜。雖消穀不能傳導。故食卽滿也。尺脉以候腎。浮爲風。則傷腎。跌陽以候胃。緊則寒。不傷胃而傷於脾。風寒相

搏邪不消穀得穀氣則熏蒸頭目故作眩也。穀不消則胃中之濁氣下流而小便又不通利。正以腎爲胃關脾寒被于少陰則不能行宜泄之令胃熱流於膀胱則熱瘀蓄而不行。一身盡黃。因作穀疸也。腎色黑與膀胱爲表裏膀胱之脉上額腎虛則黑色見於額也。微汗出。小便利。不應作疸。以薄暮屬陰手足中熱爲陰虛。太陽爲諸陽主氣膀胱急爲陽虛。腎中真陰真陽俱虛必從勞傷而得。故

曰女勞疸。腹如水狀者。土敗也。故不治。酒性濕熱。留於臍間。則懊懣而熱。懊懣則使人吐。吐則不能食。如是則濕留於中。而黃色發於外。因作酒疸也。

陽明病。脉遲者。食難用飽。飽則發煩。頭眩。小便必難。此欲作穀疸。雖下之。腹滿如故。所以然者。脉遲故也。脉遲爲寒。寒不殺穀。故食難用飽。飽則穀氣不消。胃中苦濁。濁氣蘊蓄。則發煩。熏蒸則作眩也。小便

難者以脉遲則無陽以施化。濁氣但留於胃而不宣。是以欲作穀疸。下之徒虛其胃。而腹滿如故也。所以然者。以脉遲爲寒之故。

夫病酒黃疸。必小便不利。其候心中熱。足下熱。是其證也。

夫小便利。則濕熱行。不利。則熱留於胃。胃脉貫膈。下足跗。上熏胃脘。則心中熱。下注足跗。則足下熱也。

酒黃疸者。或無熱。謔言小腹滿。欲吐。身燥。其脉浮者。先吐之。沉弦者。先下之。

此承上文而言。酒疸由於濕熱。今無心中熱。足下熱之證。但謔言少腹滿者。以酒性本熱。故發謔言。其質則水。水不行而積於下焦。故小腹滿也。欲吐。鼻燥。脉浮者。此濕熱干於上焦。當吐之以越其邪。若脉沉弦者。則飲客于下焦。當下之以去其小腹滿也。

酒疸心中熱欲吐者吐之愈。

前證熱深則懊憹欲吐今熱微則心中熱亦欲吐病屬上焦故一吐之可愈。

酒疸下之久久爲黑疸目青面黑心中如噉蒜薑狀大便正黑皮膚抓之不仁其脉浮弱雖黑微黃故知之。

前證以小腹滿而脉沉弦者當下或懊憹而熱痛者當下如心熱欲嘔者懊憹欲吐者皆屬上焦不

可下也。而反下之。傷其陰而損其胃。則腎氣乘土。久久則變黑疸矣。肝主血。開竅於目。下之陰血傷。則目青。胃屬土。面主陽明。下之胃氣損。則面黑。是以大便亦正黑也。表中之陽。乘下後之虛而客於心下。致胸中有如噉蒜齏之狀。陽既內陷。則無陽以衛其表。致皮膚抓之有不仁。其脉亦浮弱也。雖成黑疸。而色有微黃。水土相乘。色暗不明也。按畜血證。

亦便黑
發黃

金匱要略直解 卷中
師曰病黃疸發熱煩喘胸滿口燥者以病發時火劫其汗兩熱相得然黃家所得從濕得之一身盡發熱而黃壯熱熱在裏當下之。

濕淫於內則煩喘胸滿熱淫於內則發熱口燥復以火迫劫其汗反致兩熱相搏殊不知黃家之病必得之濕熱瘀於脾土故一身盡發熱而黃正以明火劫之誤也若壯有熱則熱在腹可下之以去其濕熱。

脉沉。渴欲飲水。小便不利者。皆發黃。

濕勝則脉沉。熱勝則欲飲水。小便利則濕熱去。不利則濕熱無從出。皆令發黃也。

腹滿。舌痿黃。躁不得睡。屬黃家。

舌痿。當是身痿。以陽明胃土主身之肌肉。故有腹滿痿黃之證。內經曰。胃不和則卧不安。故令躁不得睡。

黃疸之病。當以十八日爲期。治之十日以上瘥。反劇。

者爲難治。

脾惡濕黃疸之病多從濕傷於脾。夫脾不主時寄旺於四季各十八日期之十八日者盡向旺之日也。治之十日以上瘥者不踰十八日之外也。然疸有女勞酒穀濕熱之別而黃色則總統於脾故治法亦有汗吐下之異盡十八日而按法治之若反增劇者是爲難治。

疸而渴者其疸難治。疸而不渴者其疸可治。發於陰

部其人必嘔發於陽部其人振寒而發熱也。

黃家以濕熱相搏有口燥鼻燥而未至於渴。渴則津液內消邪氣獨勝不渴則津液未竭正氣未衰。治之所以分難易也。陰主裏濕勝於裏則嘔陽主表濕干於表則振寒而發熱也。此條辨疸之輕重表裏。

穀疸之爲病寒熱不食食卽頭眩心胸不安久久發黃爲穀疸茵陳蒿湯主之。

濕熱與宿穀相搏。留於胃中。因作穀疸。使人發寒。熱而不食。夫食入於陰。長氣於陽。雖食之。則清陽先走上竅。故頭眩也。心胸不安。以穀氣不消。胃中苦濁也。與茵陳湯以推陳導熱。

茵陳蒿湯方

茵陳蒿 六兩
梔子 十四枚
大黃 二兩

右三味。以水一斗。先煮茵陳。減六升。內二味。煮取三升。去滓。分溫三服。小便當利。尿如皂角汁。

狀色正赤。一宿腹減。黃從小便去也。

茵陳以導之。則濕熱行矣。大黃以下之。則宿穀去矣。苦以泄之之劑也。

黃疸日晡所發熱。而反惡寒。此爲女勞得之。膀胱急。少腹滿。身盡黃。額上黑。足下熱。因作黑疸。其腹脹如水狀。大便必黑。時澹。此女勞之病。非水也。腹滿者難治。消石礬石散主之。

黃家日晡發熱。熱在陽明胃經。不應惡寒。今發熱。

而反惡寒者。以陽明之脉。與衝脉會於氣街。陽明爲水穀之海。榮衛由此而化生。衝爲血之海。經絡由此而灌滲。勞則衝脉傷。而陽明脉損。故日晡所發熱。而反惡寒。知爲女勞疸也。二經旣傷。則膀胱腎經俱病。故有膀胱急。少腹滿也。腎色黑。而脉起於足心。故有額上黑。足下熱之證也。以其身黃而額黑。故名曰黑疸。其腹脹如水狀者。皆從膀胱急。小腹滿。而漸及於腹。是腎邪乘脾。大便亦爲之黑。

脾不治。則便黑而澹。以上諸證皆女勞之病。雖似水證。而實非水也。腹滿者難治。正以申腹脹如水。腎反乘脾之義。與消石礬石散以泄滿除熱。

消石礬石散方

消石

礬石

燒等分

右二味爲散。以大麥粥汁和服方寸匕。日三服。病隨大小便去。小便正黃。大便正黑。是候也。

內經曰。中滿者泄之於內。潤下作鹹。消石之苦鹹。

礬石之酸醎。皆所以泄中滿而潤下。使其小便黃而大便黑也。然礬石主胃脹閉滯蓄結。礬石主熱在骨髓。而經言勞者溫之。是方得無太峻歟。然所服者方寸匕耳。和以大麥粥汁。正所以寬胃而益脾也。

酒黃疸。心中懊懣。或熱痛。梔子大黃湯主之。

梔子大黃湯方

梔子 十四枚

大黃 二兩

枳實 五枚

豉一升

右四味以水六升煮取三升分溫三服。

夫酒有質有氣其氣則熱其質則飲熱蒸則爲懊
懷飲留則爲熱痛梔子豉湯者。涌泄劑也。無形之
熱得梔子豆豉可越之有形之痛得大黃枳實可
竭之上下分消以去其邪也。

諸病黃家但利其小便假令脉浮者當以汗解之宜
桂枝加黃耆湯主之。方見水氣病中。

邪在裏則利小便邪在表則發汗。浮表脉也。經曰風令脉浮。必風濕搏於皮膚而作疸。故宜桂枝生薑以發表除風。甘草大棗以益脾勝濕。芍藥以收其榮。黃耆以斂其衛。則在表之邪自不能容。當從微汗而散也。

諸黃猪膏髮煎主之。

扁鵲有療黃經明堂有烙三十六黃法。皆後人所未見。唯聖濟總錄載三十六黃方論詳明治法始

備。今猪膏髮煎能治諸黃。當是黃之輕者可從小便而去。至若陰黃急黃。女勞之屬。豈猪膏髮煎所能治乎。醫者審之。

猪膏髮煎方

猪膏

半斤

亂髮

如鷄子大三枚

右二味和膏中煎之。髮消藥成。分再服。病從小便出。

亂髮利水猪膏滑竅服之黃從小便去也。

黃疸病茵陳五苓散主之

茵陳五苓散方

茵陳蒿末

十分

五苓散

五分方見痰飲中

右二味和先食飲方寸匕日三服。

苦鹹者下泄茵陳味苦用以除黃去濕澤瀉味鹹用以導邪泄熱甘淡者滲泄猪苓味淡茯苓味甘用以滲濕泄熱水以益脾桂以宣導六味相合以療黃疸。

黃疸腹滿小便不利而赤自汗出此爲表和裏實當下之宜大黃消石湯。

腹滿小便不利爲裏實自汗出爲表和經曰表和裏實下之則愈。

大黃消石湯方

大黃

黃礬

消石

各四兩

梔子

十五枚

右四味以水六升煮取二升去滓內消更煮取

一升頓服

大黃消石。推陳以下腹滿。梔子黃檗泄熱以利小
便。四味爲下黃疸之重劑。

黃疸病小便色不變欲自利。腹滿而喘不可除熱。熱
除必噦噦者小半夏湯主之。方見痰飲中

上證小便不利而赤。今小便色不變欲自利。乃虛
熱作疸。明與上證實熱殊也。雖腹滿而喘不可下。
若下之以除熱。熱除必損胃中之陽。其人必噦也。

小半夏湯三味。所以溫胃止噦。

諸黃。腹痛而嘔者。宜柴胡湯。

經曰。嘔而腹滿。視其前後。知何部不利。利之則愈。
今黃家腹痛而嘔。應內有實邪。當是大柴胡以下
之。若小柴胡則可止嘔。未可療腹痛也。明者詳之。
男子黃。小便自利。當與虛勞小建中湯。

夫黃家得之濕鬱於內。小便不利而發黃。今小便
自利。則非濕熱也。以勞則氣傷。氣傷則倉廩失職。

而黃色見於肌肉。小建中者。建其脾也。內經曰。勞者溫之。損者益之。故溫以桂枝。生薑。益以膠飴。大棗。使芍藥以收陰血。而益脾陰。佐甘草以和諸藥。而緩肌肉。此建中之大畧也。方議詳虛勞

驚悸吐衄下血胸滿瘀血病脉證治第十六
寸口脉動而弱。動卽爲驚。弱則爲悸。

動乃數脉見於關上。上下無頭尾。如豆大。厥厥動。搖者名曰動。乃陰陽相搏。當以見於關爲是。不應

一見於寸口也。驚者爲物卒動邪從外來有動於心。故脉爲之動。怔者爲心跳動病從內生有怯於心。故脉爲之弱也。

師曰夫脉浮目睛暈黃。衄未止。暈黃去。目睛慧了。知衄今止。

脉浮爲陽盛。陽盛則迫血妄行。而血不營於目。故目睛暈黃。知其衄未止也。暈黃去。目睛慧了。則目得血營而不衄。故曰知衄今止。

又曰。從春至夏。衄者太陽。從秋至冬。衄者陽明。

靈樞經曰。手太陽上頰抵鼻。足太陽之別名曰飛陽。虛則鼽衄。正經生病亦鼽衄。手陽明之脉挾鼻。孔足陽明之脉起於鼻。而循鼻外。所生病皆鼽衄。故以太陽陽明二經主之。內經曰。太陽爲開。陽明爲闔。春夏有開之義。而衄者屬太陽。秋冬有闔之義。而衄者屬陽明。

衄家不可汗。汗出必額上陷。脈緊急。視不能眴。不

得眠。

靈樞經曰。奪血者無汗。衄家本爲失血。若汗之則諸陽脉虛。榮血失守。則顙上陷而脉緊急。夫目得血而能視。衄而發汗。損其陽而傷其陰。則血氣不營於目。故直視不得眴。眴其目不得眴。故亦不得眠。

病人面無血色。無寒熱。脉沉弦者。衄。脉浮弱。手按之絕者。下血。煩欬者。必吐血。

靈樞經曰。血脫者。天然不澤。上經曰。男子面色薄者。主渴及亡血。今病人面無血色。脫血之象也。上經曰。男子脉虛沉弦。無寒熱。時目瞑兼衄。今無寒熱。而脉弦衄者。則與上證不殊。爲勞證也。若脉浮弱。手按之絕者。有陽無陰也。故知下血。煩欬者。病屬上焦也。故知吐血。

夫吐血。欬逆上氣。其脉數而有熱。不得卧者死。

內經曰。嘔血。胸滿引背。脉小而疾者逆也。夫吐血。

欬逆上氣則肺藏傷矣。脈數則虛熱不去。火刑金矣。內經曰：人卧則血歸於肝。今血不歸肝，氣留於陽而不入於陰，陰血消亡，故不得卧，死可必矣。夫酒客欬者，必致吐血。此因極飲過度所致也。

內經曰：因而大飲，則氣逆；氣逆則欬；欬則傷肺，肺傷必致吐血。夫酒性大熱，潰脉傷經，過之則有如上諸證。

寸口脉弦而大，弦則爲減，大則爲芤，減則爲寒，芤則

爲虛寒虛相擊此名曰革。婦人則半產漏下。男子則

亡血。

註見虛勞。

亡血不可發其表。汗出卽寒慄而振。

亡血旣已傷陰。汗之又傷其陽。陽不衛外。故作寒慄而振。

病人胸滿唇痿。舌青口燥。但欲漱水不欲嚥。無寒熱。脈微大來遲。腹不滿。其人言我滿。爲有瘀血。

瘀血留於心肺間則胸滿唇痿未詳所以心主血
開竅於舌。血瘀則舌亦爲之改色也。口雖燥以胸
滿故不欲嚥。但欲漱水也。口燥非熱不欲嚥非寒
無上熱下寒偏熱偏寒之餘證。故曰無寒熱也。脉
大爲虛遲。爲有瘀血。瘀於內而不形於外。人見其
腹似不滿。其人則苦滿。此爲有瘀血無疑矣。
病者如熱狀煩滿。口乾燥而渴。其脉反無熱。此爲陰
伏。是瘀血也。當下之。

煩滿者以有血瘀於胃中胃有留滯則不能游溢
精氣而作津液故口燥而渴是以如熱狀而脉則
無熱也陰爲血伏爲瘀卽血瘀之義。

火邪者桂枝去芍藥加蜀漆牡蠣龍骨救逆湯主之
此章當在第八篇中簡脫在此。

桂枝救逆湯方

桂枝

三兩去
皮

甘草

二兩炙

生薑

三兩

牡蠣

五兩熬

龍骨

四兩

大棗

十二枚

蜀漆 三兩洗去腥

右爲末。以水一斗三升。先煮蜀漆減二升。內諸藥煮取三升。去滓。溫服一升。

心下悸者半夏麻黃丸主之。

半夏麻黃丸方

半夏 麻黃 等分

右二味末之。煉蜜和丸。如小豆大。飲服三丸。日三服。

經曰。水停心下。甚者則悸。半夏所以去水。麻黃所以勝濕。

吐血不止者。栢葉湯主之。

、栢葉湯方

栢葉

乾薑

各三兩

艾

三把

右三味。以水五升。取馬通汁一升。合煮取一升。分溫再服。

中焦受氣取汁。變化而赤。是謂血。血者。內澼藏府。

外行肌膚周流一身如源泉之混混得熱則迫血
妄行而作吐血卽後瀉心湯之證是也得寒則不
與氣俱行滲於胃中而作吐故有隨滲隨出而令
不止內經曰太陽司天寒淫所勝血變於中民病
嘔血又曰太陽在泉寒淫所勝民病見血則寒亦
令吐血也栢葉湯者皆辛溫之劑神農經曰栢葉
主吐血乾薑止唾血艾葉止吐血馬通者白馬尿
也凡尿必達洞腸乃出故曰通亦微溫止吐血四

味皆辛溫行陽之品使血歸經遵行隧道而血自止。

下血先便後血此遠血也黃土湯主之下血先血後便此近血也赤豆當歸散主之。方見狐惑

先便後血以當便之時血亦隨便而下行內經曰結陰者便血一升再結二升三結三升以陰氣內結不得外行血無所稟滲入腸間故上經曰小腸有寒者其人下重便血夫腸有夾層其中脂膜聯

絡當其和平。則行氣血。及其節養失宜。則血從夾層滲入腸中。非從腸外而滲入腸中也。滲而卽下。則色鮮。滲而留結。則色黯。內經曰。陰脉不和。則血留之。用黃土附子之氣厚者。血得溫卽循經而行也。結陰之屬。宜於溫補者如此。若先血後便而用赤小豆當歸散者。此內經所謂飲食不節。起居不時。則陰受之。陰受之。則入五藏。爲腸澼下血之屬。故用當歸以和血脉。赤豆以清藏毒。與黃土湯不

得也。梅師方云：熱毒下血，或食熱物發動，以赤小豆爲末，水調服，則知此方治藏毒下血。黃土湯治結陰下血，有霄壤之分也。

黃土湯方

甘草

乾地黄

白朮

附子

炮

阿膠

黃芩

各三兩

龜中黃土

半斤

右七味，以水八升，煮取三升，分溫三服。

竈中黃土。得火氣則性溫。用以止血爲君。附子辛熱。主血瘕爲臣。下多者亡陰。地黃阿膠益陰血以爲佐。芒以堅之。甘以緩之。黃芩之苦以堅下焦。甘草白朮之甘以緩腸胃爲使。共爲治結陰之良劑。心氣不足。吐血衄血。瀉心湯主之。

瀉心湯方

大黃

二兩

黃連

黃芩

各一兩

右三味以水三升煮取一升頓服之。

心主血。心氣不足而邪熱乘之。則迫血妄行。故有吐衄之患。夫炎上作苦。故內經曰。苦先入心。三黃之苦。以泄心之邪熱。

論曰。心氣不足則當補。此童稚所知也。而反瀉以芩連大黃。是益其虛也。何謂益。古人之法。陰虛則瀉其陽。陽虛則瀉其陰。今心氣不足。是榮衛之氣有餘也。故大瀉其氣以平之。十四難曰。損其心者。調其榮衛。內經曰。調其氣使其平也。今心氣不足。

乃瀉其餘者。則藏氣和平。諸疾不作矣。故曰聖人
治未病。不治已病。若心氣不足。而遂補心氣。是治
其已病也。何名爲未病哉。

金匱要畧直解中卷

終